

(दुसरेनुवार अदबी मैगज़ीन)

अपरिल-जून 2018

वारदा 50TH

(For Private Circulation Only)



COL. TEJ K TICKOO ELECTED AIKS PRESIDENT



अपरिल-जून 2018

वाराणसी 50

(त्रुरेतुवार अदबी मैगज़ीन)

एडिटर

ओमकार कौल

सलाहकार मंडल

शम्भु नाथ भट्ट हलीम

रतन लाल शान्त

रूपकृष्ण भट

सुनीता रैना

व्यवस्था

महाराज के पजन (प्रबन्ध)

आल इंडिया कश्मीरी समाज

डी-90, सरोजिनी नगर, नई दिल्ली 110023

वाख - 50

(त्रुरेतुवार अदबी मैगज़ीन)

अपरिल-जून 2018

पब्लिशर

आल इंडिया कश्मीरी समाज, डी-90, सरोजनी नगर, नई दिल्ली 110023
फोन 24677114, email: aiksnd@live.com

एडिटर

डॉ० ओमकार कौल, सी -13, ग्रीनविव अपार्टमेंट्स, 33 सैक्टर 9, रोहिणी,
दिल्ली 110085 फोन : 9811885545, 27556197
email: onkoul@gmail.com

पत्रवाहक जम्मू: रिकू कौल, फोन 9419136369

हकूक महफूज़

यथ मैगज़ीनस मंज़ लेख वगॉरु, इसतिमाल करनु ब्रोंह गछि लिखॉर्य, तरजमुकार तु ए आई के
एसुक इजाज़थ ज़ोरु ह्यनु युन।

कुनि ति (छाप सपद्यमुतिस)लेखनस मंज़.जॉहिर करनु आमुचि रायि सुत्य एआई कै एस या एडिटर
सुंद इतिफाक आसुन छु नु ज़ोरुरी।

कवर पेंटिंग: मृदुल भट्ट

म्वल : (देश) अख अंक: 50 रु, सालानु: 200 रु, त्रे वेंरी: 500 रु, आजीवन : 2000 रु

(विदेश) अख अंक: 4 डालर, सालानु : 15 डालर, आजीवन: 150 डालर

इशतिहार: अँदर्यम कवर : 8,000 रु, पूर सफु: 4,000 रु, ओड सफु: 2,000 रु

च्वबाग सफु: 1,000 रु

चंद सोज़नुक तु इशतिहारु खॉतरु पताह

ए आई के एस

डी-90, सरोजनी नगर, नई दिल्ली-110023

दिलि न्यँबरिम्यन चेकन गछन 40 रु अलावु आसनि

डी टी पी: आशा भट

UG 3, Plot 20, Nidhi Pride, Ext 1, Shalimar Garden, Sahibabad – 201005

8826187876, ashabhat975@gmail.com

यथ अंकस मंज....

पनन्य कथ

05

लेख

ओंकार नाथ कौल शखसियत तु कारनाम्	रूप कृष्ण भट	06
स्वामी कृष्णजुव राजदान ग्वनमाथ तु योगी	औमकारनाथ शबनम	11
मूती लाल क्यमू-कॉशिरि रंगमंचुक शहनशाह	रूप कृष्ण भट	14
दर्शुन (लोकुट नॉटय रूपक)	मोती लाल क्यमू	16
मॉज़ लागुन्य	प्रेम नाथ शाद	24
ईद	रूप कृष्ण भट	26

गाशिर्य मीनार

मूती लाल साकी	रूप कृष्ण भट	28
---------------	--------------	----

अफसानु

ऑनख	रतन लाल शान्त	34
त्रेयि त्रुहक्रोर दिवता	मखन लाल पंडिता	37
देद	रिंकू कौल	39
ठोर	ओंकार कौल	43
मनी पलांट	रूप कृष्ण भट	44
यिम छि नु तिम	देबा नज़ीर	47

शॉयरी

ब तु चु	मजरुह रशीद	49
प्रज़नथ	रतन लाल जवहर	49
गज़ुल	प्रेम नाथ शाद	50

गज़ल	प्रेम नाथ शाद	51
गज़ल	राजंदर आगोश	51
जु गज़ल	सुनीता रैना पंडित	52
गज़ल	अशोक गवहर	53
गज़ल	मोती लाल मसरूफ	54
गज़ल	अशोक कुमार धर 'गोहर'	55
आलव	रतन लाल जोहर	55
अगर चु यीहख	शाद रमज़ान	56
नज़म	ब्रज नाथ बेताब	59
गज़ल	जगर नाथ सागर	60
गज़ल	वली असीर कशतावाडी	60
मज़ाहिया नज़म	औमकारनाथ शबनम	61
गज़ल	औमकारनाथ शबनम	62

शूर्य अदब

वांदरन हुंद शहज़ाद	हलीम	64
त्रे गाडु	हलीम	65

स्वखन डूस

वाह्य,ओमकारजिया,च कोत गोख !!!	रतनलाल शांत	66
-------------------------------	-------------	----

तबसरु

डा.रूप कृष्ण भट सुंज़ ताज़ु तसनीफः अख नँव वुछन त्राय	डा. रतन तलाशी	71
---	---------------	----

लीला

सोन मोलुल सरमायि	वेष्णु राजदान	74
------------------	---------------	----

लेखन वॉल्य		80
------------	--	----



पनन्य कथ

चेमि शुमारुच पनन्य कथ पॅरिथ गछन परनवॉल्य हॉरान ति तु परेशान ति तिक्क्याज़ि यि कथ छे नु कॉशरि ज़बॉन्य हुंदिस कुनि पॅहलूहस या मसलस प्यठ बॅलकि चेमि मैगज़ीनकिस ऐंडिटर परोफसर ओमकार कौल सॉबस मुतलक यिम पॅत्मयव दॅहव वॅर्यव प्यठु लगातार पॉठय वाख परनवाल्यान ताम वातनावान रूदय । यि छे नु सॅहल कथा कॅह खासकर येलि लेखन वाल्यन तु परनवाल्यान दवशवन्य हुंद छुडयर आसि तु प्रथ कॉसि प्यन अमि खॉतरु यि दॅप्य ज़ि ति ख्वर रटुन्य । कौल सॉबनि ३मई, १९९८, स्वरगुवास गछनु सुत्यगव गव नु सिरिफ तिहुंदिस परिवारास न्वखसान बॅल्यकि सॉरसुय कॉशरिस कोमस । कौल सॉब ऑस्य आलमि सतुहुकय अदीब तु मॉहरि लिसॉनयात तु तिहुज़ वेछ्य यियि हमेशु मॅहसूस करनु । वाख वातनोव तिमव काति कोर तु वाखु दॅस्य य्वसु सेवा तिमाव पनुनि माजि ज़ेवि कॅर स्व छे थेकुन्य लायख । मे म्चूल तिमन सुत्य कॅरीबी तोर कॉम करनुक मोकु तु मे छे खबर ज़ि तिम कोताह वख ऑस्य यथ मैगज़ीनस चुकि तु दगि सान दिवान । येमि सातु तिम पॅतमिस शुमारस प्यठ कॉम करान ऑस्य तिमन बिगडयोव ज़यादय सेहत तु गॅयि फिकरमंद ज़ी वाखस कया बनि तु दोपुख व्वन्य त्रावव अँती मगर मे वोनुख ज़ि नॅ जान रोज़ि ज़ि अँस्य कडव पंचह शुमारु तु पतु सॉचव ब्रॉठकुन । तिमव मोन तु येमि शुमारुच कॉम थॅवुख मे मटि । मे छे ख्वशी ज़ि मे हयोक पनुन वादु पॉलिथ तु यि पंचॉहिम शुमारु वोत त्वहि ताम । वाख परिवारु तरफु छि अँस्य तिमन दिली श्रदांजली अरपन करान तु तिहुंदिस अयालस सुत्य छि गमस मंज़ बराबर शरीख ।

पॅतमिस रेतस दोरान गॅयि कॉशरि अदबुकय बेयि ज़ु महान अदीब तु कलमकार ति स्वरगुवास । यिम छि श्री मोति लाल केमू तु श्री प्रथवी नाथ कौल सॉयिल । यिम दवशवय ऑस्य पनुन्यन पनुन्यन मॉदानन मंज़ नामवर तु मोरूफ तु कॉशरिस अदबस, ज़बॉन्य तु कलचरस यिहुंद दयुत छु थेकुन लायाख । अँस्य छि वाख परिवार, तरफ, यिमन ति श्रदांजली पेश करान तु तिहुंदयन अयालन सुत्य ति हमदरदी वज़ॉहिर करान । दय बूज़िन यिमन त्रेसवनय महान बावन ऑसिन स्वरगस मंज़ जाय । तथा - असतु ।

रूप कृष्ण भट



औंकार नाथ कौल : शखसियत तु कारनाम

- रूप कृष्ण भट

प्रोफेसर औंकार नाथ कौल ज़ायि सिरीनगरु प्यठु लग बग पंचाह मील दूर क्वलगाम ज़िलु किस बुगोम गामस मंज़ 7जनवरी 1941 इसवी मंज़। बुगोम छु क्वलगामि प्यठु पांछ किलोमीटर दूर। आतिच आबॉदी छे लग बग पांछ हथ गरु तु ज़्यादतर लूख छि ज़ॉमीनदॉरी करान। दॅर्यावि माव खसु वेशव देरयावु मंज़ु नरान छे, छे अमि गामु मँज्य वसान। कौल सॉबन्य गरिक्य ऑस्य मावि बँठिस प्यठ बसान। कौल सॉबन्य पिताजी पंडित प्रेम नाथ कौल अर्पन ऑस्य अकि खानदॉन्य तु बजा गरुक्य जानीशीन। यिम ऑस्य थदि पायिक्य शॉयिर। यिहुंज़ शारु सॉबरन आदन याद प्योम छे छपेमुच। यिमव कोर भगवत गीतायि लीलायि रूपस मंज़ कॉशिरिस मंज़ तरजमु युस ओरदू क्यो देवनागरी द्वशवन्य लिपियस मंज़ छप्योव। यिहुंदि खानदानुक नाव तु पछान ऑस दूर दूर अलाकन ताम मशहूर तु वेज़। परिवार ओस स्यठा बोड नॅतीजन गुज़रयोव यिहुंद ल्वकचार अँकिस आम स्रवदिगरु किस शुर्य सुंद्य पॉठय येति नॅ रछन वाल्यन हुंज़ वॅमी ऑस तु नॅ गिंदन बाजन हुंज़ वेछ्य। यिम रूदय ल्वकचारस गामु माहोलु सुत्य मुतॉसिर।

गरस मंज़ ओस नु सिर्फ अदबी माहोलुय योत बॅलकि अख दारिमक्य माहोल ति। येति कॉशिर्य रेवॉयती गरन हुंद्य सनस्कार मूजूद ऑस्य। यिमव वॅर अदबुच खँदमत अँथ्य असरस तल। यिहुंद वनुन छु, “बटु गरन मंज़ ओस सुबहन शामन आरथी करनुक तु लीलायि ग्यवनुक रेवाज। मशहूर लीलायि आसु शामन शुर्य बॅड्य यिकवटु ग्येवान। सॉनिस गरस मंज़ आसु मशहूर शॉयरन मसलन परमानंद, कृष्णजुव राजदान, प्रकाश राम, वैष्णुजु राजदान नि तु म्यॉनिस वॉलिद सॉबनि लीलायि ति ग्यवनु यिवान।”

कौल सॉबस ऑस्य गरस मंज़ ज़िदय व्वमु जी या औंकार नाथ तु ल्वकट्य बाँयराज वनान। चूकि गरस मंज़ ओस परनुक लेखनुक जान माहोल, यिहुंद चाटुहाल गछुन ओस लॉज्यमी। यिमव पॅर इबतिदॉथी तॉलीम पनुनिसुय गामस मंज़। अमि पतु कोरुख मैटरिक क्वलगामि, एफ,ए अननतनागु तु बी,ए सिरीनॅगरु एस.पी कालजि। पतु कोरुख कश्मीर यूनिवरसिटी मंज़ हैदियस मंज़ एम.ए 1964 मंज़। यिमव कोर के, एम इनसटिचूट आगरा कमपरेटिव लिट्ररेचरस मंज़ पी.एच डी तु 1969 मंज़ गॅयि यिम अमरीका। अति कोर

यिमव लिंगविस्टिकस (लिसानयात) मंज एम.ए तु पतु आयि वापस हैदुस्तान ।

कौल साँबन वॅर मरकज़ी सरकारस तँहत, एजिकेशन मिनस्ट्री हुंदिस शुमॉली ज़बानन हुंदिस अलाकॉथी मरकज़सस (एन,आर,एल,सी) मंज बहिस्यति प्रंसिपल 1971 प्यठ 1987 ताम नोकरी । अमि पतु रूदय यिम लाल बहादुर शास्त्री नेशनल एकेडमी आफ एडिमिनस्ट्रेशन मसूरी मंज ज़बानन हुंदिस डिपाटमेंटस मंज बहँस्यति प्रोफेसर क्यो हेड सतन वॅर्यन । 1994 मंज गॅयि यिम सेंट्रल इनसटिचूट ऑफ इनडियन लैंगवेजस मयसूरस मंज बहँस्यति डिपटी डयरेक्टर तु अति रूदय नोकरी हुंदिस आँखरी मरहलस ताम । यिम गॅयि 2001 मंज बहिस्यति डयरेक्टर रिटायर ।

अँलमी तु अदबी कारनाम

लग बग पंचाहन वॅर्यन प्यठ मुश्तमिल कौल सुंदि अँलमी तु अदबी कारनामन हुंज ग्रंद छे स्यठा ज़ीठ । अथ दोरान छि यिमन पंचाह (50) खोतु ज़्यादु किताबु तु डवड हथ (150) खोतु ज़्यादु तँहकीकी परचु लीख्यमित्य । यिम छि दून क़समन हुंदय अदबी तु लिसॉनी । यिम छि वनान, “ म्यॉनिस लेखनस परनस मंज छु ग्वड कालु प्यठय गरुक्य तु समॉजी माहोलन असर त्रोवमुत । शोक तु ज़ोक पॉदु करनस मंज छु गामु माहोलुक अख म्वलुल हिस्सु । म्यॉन्य वॉलिद साँब आँस्य शॉयिर । गरस मंज आँस्य ओरदू ज़बॉन्य हुंदय अखबार तु रिसालु वातान । प्रानि किताबु आसु दँस्याब । मे बडयोव लेखनुक शोख ।... (आलव 2002)

तँहकीकी काम्यन मंज छे ग्वडनिच संजीदु कॉम, “कॉशिर्य तु हैदी रामायनन हुंद तकाबली जॉयज़ु” । अथ मंज छु यिमव कॉशर्यन तु हैदी ज़बानन हुंदयन अँहम राम कथा शॉयरन तु तिहुंजन तखलीकन तकोबली मुतालु वॅगरिथ यिहुंद हिशर तु ब्येन हॉविथ द्युतमुत । यिमव छे नरेंदर दुलय सुत्य रॅलिथ पंजॉब्य ज़बॉन्य मंज “कश्मीरी साहित्य दी तारीख” लीछमुच यवसु पंजाबी युनिवरसिटी छपाँव तु कोरसस मंज शॉमिल वॅर । यिमव छि राम कथायि, कृष्ण कथायि, सूफी शॉयरी, लल देद, नुंद रयोश, हबु खोतून, मँहजूर, दीनानाथ नॉदिम, परमानंद, कृष्णजुव राजदान वगॉरु मोज़ूहन प्यठ तँहकीकी मज़मून लीख्यमित्य । यिमव यिमन किताबन प्यठ तबसरु वॅर्य तिमन मंज छे महमद ज़मान आजुरदा सुंज “एसे,” चमन लाल सपरु सुंज “दीना नाथ नॉदिम”, बदरी नाथ पारिमू सुंज “एसैत आफ दि सेलफ”, एम जे अकबर सुंज “बियोंड दि वैली”, शॉमिल । तखलीकी सँथरिस प्यठ वॅर यिमव कॉशरिस तु हैदी ज़बानव प्यठ शॉयिर तु अफसानु सिनफव सुत्य शोरुआत । लेखनस मुतलक छि यिम वनान, “बु क्याज़ि छुस लेखान ? यि छे अख बँड मजबूरी येमि मंजु नँ मे अज़ ताम फुरसत मीज । ज़िंदगी छे वखतस ताबेह,

वखुत छु ज़िंदगी पकनावान। वखुत गुज़रुन छु ज़िंदगी गुज़रुन तु ज़्यादा तर छे म्येकनिकी अंदाज़ ज़िंदगी पकान यथ मंज़ नु पनुन कंट्रोल छु। नोकरी हुंज ज़िमवॉरी पूर करान, परुन तु लेखुन रूद मे यि म्येकनिकी ज़िंदगी बसर करनुक अख हिसु। बु रूदुस लेखान। वारयाह तँहकीकी मज़मून छपेयि, किताब छपेयि तु नॅव्य नॅव्य मोजू आयि ब्रॉह कुन। कॉशरिस मंज़ तदरीसी म्वाद तयार अलावु लिसॉनयती एतबारु रूज़ मे खॉहिश ज़बॉन्य प्यठ कॉम करनुच। म्यॉन्य खॉहिश ऑस कॉशरिस प्यठ कॉम करनुच। यि बनेयि अख मजबूरी। (आलव 2002)

यिमव छु कॉशर्यन अफसानन हुंदि तरजमुच अख स्बरन “कशमीरी कहानियाँ” हँदी ज़बॉन्य मंज़ 1992 मंज़ छापमुच। यिमव लीछ पानु ति ग्वडनिच अफसानु स्बरन “मुलाकात” (2001) हँदी पॉठय यथ मंज़ 55मिनी अफसानु छि। यि किताब आयि पतु कॉशरिस तु ओरदुहस मंज़ ति तरजमु करनु। यिहुंज दारयिम कॉशिर् अफसानु स्बरन छे “ऑखरी फॉसलु”। पनुन्यन अफसानन मुतलक छि वनान, “पनुन्यन अफसानन मुतलक कँह वनुन छु मुशकिल बेयि ति तिमन अफसानन यिम ज़न कॅचन वाकन, चिहयन, किरदारन सुत्य वाबस्त आसन-यिमन मंज़ छि तिम अफसानु ति यिम र्यवॉयती रदज़ बंदी मंज़ छि नु यिवान।

लिसॉनयाँती कॉम :

कॉशरिस लिसानियातस मुतलक आयि संजीदु पॉठय तँहकीकी कॉम कुनवुहमि सँदी हुंदि ऑखरु प्यठ करनु। वारयाहव यूरपी अँदीबव तुल अथ कामि ग्वडु दस तु कॅरुख वारयाह कॉम। मगर ग्वडु अनवारि हुंज ग्वडनिच तु थैकुन्य लायक कॉम ऑस पंडित ईशवर कोलुन्य संस्कृत पॉठय ग्रॉमर “कशमीरी शब्द अमरेत” यि ग्रॉमर बन्धोव ग्रयरसन संज़ि कामि हुंद अख अँहम वसीलु। तनु प्यठ अज़ ताम आयि कॉशरि ज़बॉन्य हुंदिस प्रथ कुनि पँहलूहस प्यठ तँहकीकी कॉम करनु। यथ मंज़ कॉशर्यन तु गॉर कॉशर्यन दृशवनय हुंद हिसु छु। वुहमि सँदी हुंदिस दोयमिस हिसस मंज़ वँथ्य ख्वश किसमती किन्य वारुह कॉशर्य लिसॉनी मॉहिर यिमव पनुनि माजि ज़ेवि प्यठ हावुन्य तु बावुन्य लायख कॉम कॅर। यिमन सारिनय अँदीबन, तँहकीकारन तु लिसॉनी मॉहरन मंज़ छि सरि फिरिरिस प्रोफेसर ऑकार नाथ कौल। यिमव छे कॉशरि ज़बॉन्य हँदिस प्रथ कुनि पँहलूहस प्यठ कॉम कॅरमुच ति सोरुय येतिनस फिरुन छु नु मुमकिन मगर कॅचन खास खास काम्यन हुंद ज़िक्र करुन छु लॉज़्यमी।

प्रोफ कौल संज़ ग्वडनिच किताब छे लिंगविस्क स्टडीज़ इन कशमीरी 1977 अमिव्य अँहम हिसु छि नवुन फ़ज़, वर्ब फ़ेज़, एडजकटिव फ़ेज़ वगॉरु। अमि पतु कॅर

यिमव अमरीकी मॉहिरि लिसॉनयात पीटर हुकस सुत्य मील्लिथ एसपेकटस ऑफ कश्मीरी लिंगविस्टस 1984 किताब ऐडिट। अथ मंज छि वारयाहन ऑल्यमन हुंद्य परचु शॉमिल। यिमव वॉर्य कॉशरि ज़बॉन्य हुंद्य दरसी म्वाद तयार यिम छि एन इनटोनसिव कोरस इन कश्मीरी 1985, एन इनटर मिडियेट कोरस इन कश्मीरी 1994, एडिकशनरी आफ कश्मीरी प्रोवरबस, स्पोकन कश्मीरी 1987 वर्गोरु।

प्राफ कोलन वॉर वारयाहन गॉर कॉशर्यन स्कालरन सुत्य ति कॉम यिम छि पीटर हुक्स अलावु, बोरिस ज़खारीन, काशी वॅला। रुथ लैला शमित, लुदमिला खोखोलोव। काशी वॅली सुत्य रॅलिथ ल्यूख यिमव कश्मीरी ऐ कागनिवि लिंगविस्टिक ग्रामर तु “माड्रन कश्मीरी ग्रामर। रुथ लैलायि सुत्य रॅलिथ ल्यूख यिमव, कोहिसतानी तु कश्मीरी, सोशियो लिंगविस्टिक सरवे आफ कश्मीरी, दारदिस्तान रिविज़िटिड। यिमव वॉर, कश्मीरी लैंगवेज, लिंगविस्टिकस, कलचर नावु अनोटेटिड बिबल्योग्रफी ति तयार।

यिहंजुन बाकी काम्यन मंज छे इफेकटिव कोमिनिकेशन सिकलज, टापिकस इन हेंदी लिंगविस्टिकस, स्टडीज़ इन कश्मीरी लिंगविस्टिकस, माडर्न हेंदी ग्रामर, एनिवज़ पेपर रीडर इन कश्मीरी, लंगवेजस आफ जमू एंड कश्मीर ति शॉमिल। मे वॉर यिमन सुत्य “लंगवेजज़ ऑफ पंजाब” तु “लंगवेजज़ ऑफ हरियाणा” ति एडिट। प्रोफसर कोलन कोर स्तुथ एशियन लंगवेज रिविव (SALR)रिसालु लग बग त्रुहन वॉर्यन एडिट। यिमव कोर कॉशुर अदबी मैगज़ीन “वाख” दॅहन वॉर्यन एडिट ख्वसु थैकन्य लायख कॉम छे।

ऐजाज़तु एवार्डः

प्रोफसर कोलस छि वारयाह ऐजाज़ तु एवाड मील्यमुत्य यिमन मंज भारत सरकारुक सी,एच,डी 1975, इनटरनेशनल सुसयटी फार आर्ट कल्चरुक 1996, भारत सरकारुक गॉर हेंदी भाषी वल्यन हुंद अवार्ड2003, कृष्ण राजदान सरस्वती अवार्ड - 2004। यिहंदि नावु छप्योव बावथ कलचरल सुसाईटी प्रोफसर कौल न०-1997तु भारतीय भाषा संस्थान मयसूरन “पेपरस इन एपलियिड लिंगविस्टिकस नावु अख सपेशल वोल्चूम फार औंकार कौल- 2001।

प्रोफसर कौलन लीछ पुन्य स्वानेह शकलि मंज “विसफरिंग वार्डस-ए मेमायर 2017 ख्वसु लूकव स्यठा पसंद वॉर। अथ मंज छि यिहंदि जिंदगी हुंद्य अँहम वाकु क्यो तफसील दरुज तु मुखतॅलिफ अँदीबन साँथ्यन तु अँहम इनसानन हुंज यिमन मुतलक राय दरुज। प्रोफसर रतन लाल शांत छि यिमन मुतलक वनान, “ कौल साँबनिस गॉर लिसॉन्याती अदबस म्वलऑकवन करनु ब्रॉह छु असि एहसास गछान जि अँस्य छि अँकिस आलमी स्यथरुकिस मॉहरिस ब्रॉठकनि खडा, यसुंद दयुत मुलकस मंजय योत नु बॅलकि नेबरु ति थ्यकनावनु आमुत छु।

अँलमी तु अदबी प्रोग्रामन मंज शरकत करनुकि गरजु छि तिम वारयाहन मुलकन फीर्यमुत्य यिमन मंज अमरीका, रूस, बरतानिया, एसट्रेलिया, फांस, जापान, कनाडा, बेलजियम, थयलैंड वगॉरु मुलख शॉमिल छि ।

3 मई2018गँयि प्रोफसर औकार कौल दिलि मंज तँवील बेमारि पतु स्वर्गुवास तु कौशिर ज़बान तु लिसॉन्यात गव अँकिस मायानाज़ अदीबस तु रुतिस इनसानस निशि महरूम । औकार कौल सुंद द्युत तु नाव रोज़ि हर हमेशि ज़िंदु तु अमर ।

वाख

वँशीरी नेबर हेकि कौशरि खौतरु देवनागरी अख अँहम लिपि बॉनिथ । देवनागरी लिपि मंज छु कौशुर परुन तु लेखुन सँहल । वँशीरि नेबर कौशुर परनु तु लेखनु खौतरु छे दिलचस्पी बडावुन्य तु बरकरार थावुन्य ज़रूरी । अमि खौतरु हेकि वाख अख अँहम वसीलु बँनिथ ।

देवनागरी तु कौशुर

वँशीरी नेबर हेकि कौशरि खौतरु देवनागरी अख अँहम लिपि बॉनिथ । देवनागरी लिपि मंज छु कौशुर परुन तु लेखुन सँहल । वँशीरि नेबर कौशुर परनु तु लेखनु खौतरु छे दिलचस्पी बडावुन्य तु बरकरार थावुन्य ज़रूरी । अमि खौतरु हेकि वाख अख अँहम वसीलु बँनिथ । यि गोछ सारिनुय गरन मंज वातुन । वाख पॅरिव तु परनौयूख बाकी ति । देवनागरी लिपि मंज कौशुर लेखनु खौतरु वँरिव यिमन निशानन हुंद इस्तिमालः

ॠ	तुर, कुरु, पुरु, गछु	ॡ	तुरु
ॢ	गौर, नौर, अँर, हँज		गौर, नौर, दौर, आँठ
ॣ	बेह, च़े, मे, पेठ	।	दौर, तौर, नौर, होल, दौल, च़ोल

स्वामी कृष्ण जू राजदान-अख योगी तु गोनमाथ

ओमकार नाथ शबनम

योदवय सानि नवि पुयि (generation)पनुनिस धर्मस तहज़ीबस तु सकाफतस (Culture)मुतल्क ज्ञानकारी हॉसिल करनस कुन यि दॅपिज़ि ति पचि छे ति कॅरिथ ति छि सानि प्राणि पुयि हुन्द्यन अकसर लूकन छे पनुनि तमनदुनिच, अदबुच तु कलचरुच तीचुई दग स्नेह तु श्रपथ यीच तिमन माजि कॅशीर हुन्ज़ छेय। अमापोज़ यथ मशीनी तु कमप्यूटरकिस दोरस मन्ज़ गयि तिम सॉरी वसीलु नायाब यिम असि ओर कुन मॉल ऑस्य फिरान।

बु छुस पानु वैशाली रोज़ान, मगर म्यॉन्य ज़्यादतर बन्द तु बांधव छिह जेमि बसान लेहज़ा छुस बु मॅन्ज़य मॅन्ज़य तोर गछान तु रोज़ान। अकि दोह गोस बु पनुनिस नेचिवि सुन्द घरु युस हज़ूरी बाग रोज़ान छु अमापोज़ दरवाज़ अँचिथुई गव म्ये यि शिव भजन कनन

“ब्यल तय मादल वेनु गोलाब पम्पोश दस्तॉय,
पूजायि लागय परम शिवस शिवनाथस तॉय।

भजन ओस रेडियो शारदा प्यतु नशर सपदान। यि लॅज मेय अन्दर अँचिहत पता ज़ि कांह ति भटु गरु युस सुय जेमिस मन्ज़ रोज़ान छु शारदा रेडियो प्रथ दोह बोज़ान।

खॉर यि कथ आसि सारिनी चेतस ज़ि अमि मस्त तँ मदहोश करनवालि भजनुक्य तखलीक कार ऑस्य कृष्ण जू राजदान।

राज़दान सॉब ऑस्य अनंतनाग ज़िलकि वनपुह मामिक रोज़ान वॉल्य, मॉलिस ओसुस नाव गणेश रैणा। राजदान सॉबकर ज़ायि तु कर गयि स्वर्गास छु नु सैकु पॉठय पतह। बकोलि मोती लाल साकी तु सोमनाथ भट वीर यिम बहलि पायिक अदीब तु नकाद ऑस्य छु यिहुन्द ज़ा सनु भाद्र जून पछ चोरम याने विनायक चोरम तु सन ओस 1850। 13दिसम्बर 1926गयि यिम स्वर्गवास।

यस पानु दय सुन्ज़ कृपा आसि तस क्या छु हाजत, दपान मॉज्य रॉगन्यायि ढोल अमिस भाग्यवानस तमि सातु पनुनि शफकतुक अथु येलि सु वुनि बालक अवस्थायि मन्जुई ओस। पनुनि अथु आपरोवनस तमि क्षीर येलि माता तस निश स्वपनस मन्ज़ आयि

यिहोय मेछर तु मट्रेर रुद कृष्ण जू सुन्दिस बावच बलस मन्ज हमेशु प्रेडान। दपान त्युथ साजगार रूहोनी माहोल सपदचोस नसीब जि बालु पानु प्यठय लोगुस साधन तु सन्तन हुन्द संग। राजदान साँब येलि फिक्रि प्यव सु लोग गुरु भत्तिकुन तु गोव तँथ्य मन्ज लीन। योग साधना दौरान गनेयस वेदान्त तु शिव दर्शनस प्यठ यछ तु पछ यथि कँन्य गनेयस बटु धर्मस कुन कल। यि ओस सु वख येलि कँशीरि मन्ज महाराजा प्रताप्त सिंह तखतस प्यठ ओस. यि राजु ओस पानु ति अख थोद धर्मात्मा।

दपान प्रताप सिंहहस ओस नु कान्ह औलाद येमि किन सु दीवी धारन प्यठ ढेँब बोछि गछान ओस, किथताम पाँठय गव महाराजस वोथवुनिस भगवानस मुतलक कनन, दवान तु दौरान वोट राजदान साँबस निश। भगवान सुन्ज दयगथ वुछतव राजस जाव सन्तान यिथु पाँठय बढेयि राजु प्रताप सिंहस अँमिस योगियस प्यठ पछ तु पनुनिस दर बारस मन्ज कोरुन सन्तन फकीरन लोलु खोल भत्ति भावस तु धर्मस लोग वोथभव। प्रकाश राम कुस्य गॉम्य, परमानन्द ही गोनमात ति अँस्य अमी दोरिक् पाँदावार। बुल बुल नागॉम्य, कालु वास्य, महमूद गॉमी, नयामु साँब ही सोफी शायिर ति वँथ्य अँथ्य दोसरस मन्ज।

कृष्ण जू राजदान सुन्द कलामु परिथ छु जाँहिर सपदान जि तिम अँस्य लच्छद, नुन्द ऋषि रोपु भवानी तु परमानन्द नि कलामु सुत्य स्यठाह मुताँसिर गॉमित-सूफी शाँयिरन हुन्द ति ओसुख स्यठाह असर युस ज़न राजदान साँबुन कलाम परनु तलु छु फिकरि तरान। अगर वुछव स्यदि स्योद असर ओस स्वामी परमानन्दनुय।

राजदान ओस जवानी मन्जई परमानंदस निश मटन गछान योदवय परमानन्द वाँसि किन राजदान साँबस ज्युठ ओस मगर ति आसिथ ति ओस सु राजदान साँबस स्यठाह आदरसत्कार करान। अँथ्य वक्तस मन्ज गौ परमानन्दुन 'शिव लगन' ति आम मकबूल। भत्ति शायिरी मन्जियमव गोनमातव मंजु यिमव कृष्ण जू राजदानस सुत्य सुत्य लीला शँयरी वोथभव द्युत तु पनुन कलाम लूकन हन्जि ज़ेवि मन्ज आम कोर तिमन मन्ज अँस्य मिंजु काक, वेष्नु जुव राजदान, प्रकाश राम कुरगॉमी ही शाँयिर ति।

परम शिव छि अख अबदी हकीकत, काँशरिस शिवमतस मन्ज छे यि हकीकत दोन इस्तिलाहन प्यठ मुशतमिल तु तिमु छे :

“च्येशु तु विर्मश” येमिच वखनय शिव सूत्रस मन्ज छे आमुच करनु। पेश छि राजदान साँबुन यिम ज़ु शार-

ढल मु होशु चेत की पम्पोश छाव

सरु कोर संसार नदरुई द्राव ।

सर तु डल छि पाँनिस दरशावान, सरु गोव करुन या वनव व्यछनावुन मतलब चु मु

गछ हकीकत निशु दूर यि हकीकत छुय 'च्येथ' ।

बुनयाँदी तौर छय यिमन सारिनी इस्तिलाहन हुन्द मतलब अदबी हकीकत (supreme reality)हुन्जुय ज्ञान यिहय छि “ च्येथ तु ज्ञान छि इसतिलाहव याने 'सरु कर' तु 'डल मु' दस्य हॉसिल सपदान । पोन्य छेय तरवलीकुकि आगरुच अलामत तिक्याज़ि वैष्णव ओस पनुनिस सर्फस प्यठ बिहिथ पॉन्य सुई तरान - येलि ज़न अँथ्य सरस मन्ज़ पम्पोश पॅटिथ द्राव यि छु असि यिहोय इशारु दिवान ।

“ च्येत की पम्पोश छाव” ।

ब्याख कथ छय ज़ि हरगाह सोरुय ज़गत पॉनिस प्यठुय दारमदार थावान छु ति वॅरिथ छु यिहोय ज़गत पानिकी पॉठय नापायदार । नदुर क्या छु यि छु पोन्य ।

कॅचन हुन्द वनुन छु राजदान साँब ऑस्य सिरिफ योगी तु साद यि छु नु यूतय तिम आस्य गृहस्थ धर्म ति पालन करान ।

कर्म धर्म करनस सुत्य सुत्य ओस शार ति वनान । शॉयिरी मन्ज़ युस फलसफु तु ज्ञान तिमव बयान छु कोरुमुत तु लूकन ताम वातनोवमुत तमि किन छि सु सारिनी हुन्दचन दिलन मन्ज़ अज़ ति बँसिथ । अँमि सुन्दय कॅन्ह शार छि:-

योगचि ढबि छय लछि बँज्य हेरय

कृष्णस फेरे निशु मौकलवान ।

ह्युर खारुन छुस गोडन्युक पोरुय

परम शक्ति गव लछ नोवई ह्यथ

सत चित आनन्द अमृत चावतम

सत गुरु हावतम गटि मन्ज़ गाश

यनु छुक छॉडिथ तथ मकानस

गोमुत छुक अज्ञानस मन्ज़

ओन छुस जॉन्य हुन्ज़ वथ ह्यछ नावतम

सतगुरु हावतम गटि मन्ज़ गाश

अँस्य कौशिर छि अमि रंगु स्यठाह

भाग्यवान ज़ि असि मन्ज़ छु राजदान परमानन्द

लच्छद, रोप भवानी ही थदि पायिक गोनमात वँथ्यमित ! हर गाह अँस्य

यिहुन्ज़न कथन फलसफन तु ज्ञानस प्यठ अमल करव तु पनुन्य यि वरासत रँहछरावव असि अचि नु 'खोरस ज़ांह ति कौंड ।



मूती लाल क्यमू-कॉशिरि रंगमंचुक शहनशाह

रुक कृष्ण भट

पदमश्री मूती लाल क्यमू कॉशिरि रंगमंचुक शहनशाह गव 15 अपरेल 2018 दूह जेमि स्वर्गवास। अँथ्य सुत्य वोट तसुंद 60 वॅरयनहुंद अदबी तु सकाफती सफर अंद तु कॉशुर ड्रॉमा गव अँकिस थँदिस तु बहलि पायि कारकुनस निशि महरूम। कयमू सुंद कॉशिरिस रंगमंचस द्युत बहिसयति अख अदाकार डायरेक्टर, प्रदूसर, ड्रॉमानिगार तु ड्रॉमा तँहरीक हुंद अलम बरदार छु बेमिसाल तु शुर्य पानु प्यठु स्वर्गवास गछनस ताम रुद सतुंद ड्रॉमाकिस मॉदानस मंज्र अख ज्यूठ सफर स्यठा दिलचसप। तँम्य कोर बहसियति अख बाल कलाकार पनुन ड्रॉमा सफर शोरु तु कॉशरिस ड्रॉमा तँहरीकस सुत्य सुत्य सपुद अँकिस कामयाब हिदायतकार, ड्रॉमा नॅवीस तु अदाकार संदिस रूपस मंज्र बालेग। अथ ज्रीठिस सफरस दोरान लीख्य तँम्य चतजीह खोतु ज्यादा मुकमल ड्रॉमा। तँम्य बनाँव ड्रॉमा पनुन्य करमु भूमी ति तु पेशि ति।

कॉशुर बाँडु पॉथुर फांफलावनस तु यि थँदिस अयामस ताम वातनावनस मंज्र छु तसुंद बोड बारु द्युत। बाँडु तु तिहुंद फन कोमी सतहस ताम वातनावनस मंज्र छु तिहुंद बोड बारु हिस्सु। तिमव दिच बाँडन ड्रॉमायी सलॉहयच बडावनु खॉतरु तरबियत तु तिम वॅरिख तकनीकी जॉव्यजारव सुत्य वॉकफ तु जॉन्याब।

कयमू रुद जमू कश्मीर कलचरल अकादमी हुंद ओहदुदार तु बहिसयति अडीशंनल सेकरिट्री गव रिटायर। अथ दोरान वॅर तिमव वॅशीरि मंज्र ड्रामा फनस सुत्य सुत्य बाकी अदबी तु सकाफती काम्यँन व्वसजार दिनस मंज्र काफी कॉम तु कॉशुर कलचर कोरुख मशहूर तु मोरुफ।

तिमव छि दरजनवाद ड्रॉमा किताबु लेछिमचु छाय, उख येलि चलन, शाह पॉथुर अकनंदुन, तोत तु ऑनु, नगर वुदॉस्य, त्रुनोव, वगॉर वारयाह मशहूर छि। क्यमूहन छे ड्रॉमाहव अलावु बेयि ति वारयाह किताबु लेछिमचु। यिहुंज्र अख हिंदी नावल पशुगाथा छे बडु जान नावल यथ मंज्र इसतिहारव तु तशबि हिव्य रंगय समॉजी तु सयॉसी बिदतन तु मामलन परदु तुलनु आमुत छु। यिहुंज्र किरदारनिगॉरी छे स्यठा दिलचसप तु आम फँहम। यिमव छि तवारीखी किरदार ति पनुन्यन ड्रामाहन हुंदय किरदार बनयॉयमित तु

राजतरंगनी हुंदि हवाल् छिख वारयाह किरदार पनुन्यन ड्रॉमाहन इन्द्य पॉथुर बनॉव्यमित ।

क्यमूहस छि वारयाह यनाम क्यो ऐजाज़ दिनु आमृत्य यिमन मंज़ साहित्या अकादमी अवार्ड, संगीत अकादमी अवार्ड ति शॉमिल छि । तिमन छु भारत सरकारन पदम श्री ति द्युतमुत । पनुनि माजि ज़ेवि अलावु ल्यूख मितव हैदी, ओरदू तु अंगरीज़्य ज़बानन मंज़ ति । तिमव छि हतु बँदय लेख तु परचु लीख्यमुत्य । कॅशीरि हुंद्यन तु कॅशीरि नेबर वारयाहन रिसालन, मैगज़ीनन मंज़ छि तिहुंद्य लेख छपेमुत्य । तिमन मुतलक छि मशहूर अदीब प्रोफ़ेसर रतन तलाशी वनान “ यि छे बडु अँहम कथ जि क्यमूहन थँव तिथि विज़ि ड्रॉमा लखनुच रेवायथ काँयिम येलि अँस्य पनुन्यन मूलव निशि दूर पेमुत्य अँस्य ।” अफसानु निगार क्यो नकाद प्रोफ़ेसर रतन लाल शांत छि वनान “ क्यमू ओस अख थदि पायि ग्वनमात मशरिकी तु मगरिबी ड्रॉमा तरकीबी हुंद माननु आमुत माँहिर ।” क्यमू छु पानस मुतलक वनान, “ ज़िंदगी हुंद्यन पंचाहन वॅरयन रुज़ुस रंगस सुत्य वाबस्तगी, च़तजीगन वरॅयन कॅरुम काँशिरि कलचरुच खँदमत अदबस, संगीति नाटकस, तु फननि लतीफस सुत्य थॉवुम वुमरि वाबस्तगी ।

क्यमू सुंद नेचुव रवी क्यमू छु बालीवुडस मंजड डयरेक्टर तु काँशिरिस रंगमंचुस सुत्य ति छु वाबँस्तु । क्यमू सुंज कूर छे संगीत तु फनुच व्वस्ताद तु तसुंद जुर कूनाल क्यमू छु बालीवुडस मंज़ एवटर ।

क्यमू ओस अख जान, मायि बोरुत, ज़िंदु दिल तु रुत इनसान । बु ज़ानुहॉन सु पँत्यम्यव लगबग च़तजीहेव वॅरययव प्यठ । तसुंद सौहबत तु संग ओस लूबवुन तु खवशनसीबी । येलि येलि ति ड्रामा फनुच ज़िकिर व्वथि मूती लाल क्यमू यियि आदरु तु सतकारु सान याद करनु । भगवान दियिन तस वेषनु बवनस मंज़ जाय ।

देवनागरी लिपि मंज़ छु काँशुर परुन सँहल । काँशुर परनु खॉतरु छे दिलचस्पी बडावुन्य तु बरकरार थावुन्य ज़रूरी । अमि खॉतरु हेकि वाख अख अँहम वसीलु बँनिथ । यि गोछ सारिनुय गरन मंज़ वातुन । काँशिरि ज़बान छे साँन्य प्रज़नथ, असि छे यि कुनि ति सूरतस मंज़ काँयिम थवुन्य ।
वाखु खॉतरु सूज़िव तु सोज़नॉविव चंद । वाख-परिवारस दियिव वुसजार ।



दर्शन(लोकुट नाटय रूपक)

मोती लाल क्यम्

परदु बोथान तु प्रयवुन संगीत छु व्वतुलान ब्रॉह स्टेजस प्यवान गाश, सूत्रधार
अचान कौशुर बटु वरनस मंज । सु छु गुल्य गंडिथ लूकन मुखॉतिब सपदान ।

सूत्रधार : नमस्कार ! योर आमृत्यन भक्त ज़नन छुस बु वछि वालिंजि स्वागत करान । कौशुरि शॉयरी मंज छु भक्ति शॉयरी पनुन खास मुकाम हॉसिल । यिछि शॉयरी मंज व्वतुलेयि शिव लीलायन लरि लोर कृष्णु भक्ति तु राम भक्ति हुंजु नहजि तु त्रायि युथ ज़न केंचन शॉयरव वॅर पनुनि वॉसि खॉलिस पनुनिस आराध्य दीव सुंज भक्ति तु लीलायि करिनस अर्ग-पोश-चदुंन ज़ॉनिथ अर्पण । यिम लीलायि छे मोदर्यन तु म्येछन लयन मंज । अवय आयि तुम्बखनार्यन प्यठ बटुन्यव दॅस्य तु छकरि गर्यव दॅस्य यसलु पॉट्य ग्यवन । केंचन संस्कृत त्वतायन हुंद कौशुर रूप ति आव लीला नहजि तल ।

पेश छु अख लोकुट संगीत रूपक युस पं.परमानन्द, कृष्ण जू राजदान तु आफताब जी सुंजन केंचन लीलायन प्यठु छु मबनी, रचनाकार छि प.मोती लाल क्यम् । वुछिव!!

(सूत्रधार छु नेरान । सोत सोत संगीत चलान । गाश प्यवान स्यटस । कुल्य गनिरस मंज थज़रस ध्याणु मुद्रायि मंज बा व्यकार, छोट प्रोन बटु दस्तारु दिथ फ्यरन लॉगिथ, बोड ट्योक करिथ बटु बिहिथ, सु छु स्पार्ट तल तु ज़नान आवाज़ उबरान)

ज़नानु आवाज़ : अँछ वॅटिथ छ्वपि हर्यंदिस आलमस मंज छु शॉयिर ध्याण वॅरिथ पनुन अंदरून मस्ती मंज लयि अँनिथ कल्पनायि मंज ज़न तु गोकुलच तसवीर च्यतरावान तु गंगुरावान

(गावन तु वछ्यन हुंजु मॉर्यमंज आवाज़ रलि संगीतस सुत्य । अमी सातु अचन कुल्यन गावन, वॅछ्यन हुंद्य कट-आउट ह्यथ कॅह तु सजावन गोकुल

सेट । सुती वुबरान शायिर संज लयि बंद आवाज़)

शायिर (ग्यवान) :

गोकुल हृदय म्योन तति चोन गूर्यवान ।

च्यथ विमर्श दिप्तिमान बगवानो ।।

(कैह गूपियि असुन करान अचान । बंसरी हुंज तेजान तु गूपियि ज़न तु देवानु गछान)

शायिर : (ग्यवुन)

वृच म्योनि च़ेय पतु लारान ।

बंसरी नाद वाद मतानो ।।

गूपी १ : बोज़ान छखु ! छोर्यून कथ कुजि, कथ ज़ंडस तल छु चूरि ।

गूपी २ : कति छु सु मार्यमोंद शुर ! वाह ! मछिल शुर !

गूपी ३ : वाह ! क्या बनसरी नाद छु ! दूरिव ! छोर्यून प्रथ अंदु ! यर्पाय !

हुपर्य, न न च्वपर्य!!

(तिम असान असान कुल्यन तु गावन पतु ब्रोंह चकर दिवान ।)

शायिर (ग्यवुन) : नशिरिथ ह्यस तु होश मुशिरिथ पर तु पान च्यथ विर्मश

दिप्तिमान बगवानो ।

(गूपियि छे पादव सुत्य रोनि वायन तु नचान)

ज़नानु स्वर : (ग्ववुन)

आकाशि म्वख छुख आकाश बासान ।

तत् सत् प्रकाश आसानो ।।

(गूपियि ज़न तु त्वता परान । ईश्वरस नमान बेतरु)

ज़नि कोरस : दीवन हुंदि दीवु प्रानियन हुंदि प्रानु ।

च्यथ विर्मश दिप्तिमान बगवानो ।।

(गूपियि असान असान अख अँकिस रटान, लोंचन लमान तु असान - ज़न तु बदि कोडुख पतु वनान)

गूपी १ : च़ोल खोखजि खोखजि च़ोल !

छोन्य छोन्य रोनि लॉगिथ चोल!!

गूपी २ : छ्यफ दिथ गव मॉजि जसदायि निश!!

गूपी ३ : हय क्या गोम! शायद खूच! मॉसुम तु मछ्युल शुर छुना! दोदु ह्यडुर!!

गूपी ४ : न्यंदर आस्यस खँचमुच. माजि हुंजि कोछि मंज त्रावि शॉग!

गूपी २ तु ३ : आ आ पकिव गूर गूर करोस।

(तिम कट आउटव पॅत्य ब्रूंतय पॅकिथ यिवान तु विंगव मंजु अनान

अख अज कौल्य मंजुल। चोन खूर्यन प्यठ लकरि मंजुल। मंजलिस मंज छु ३-
४ वुहुर बाल-कृष्ण। यीतिस कालस यि रंग-क्रया रोजि चलवुन्य तीतिस
कालस वुबरि यि पस मंजरस मंज!)

जनानु कोरस : दीवन हुंदि दीव प्रानियन हुंदि प्रानु।

च्यथ विर्मश दीप्तिमान बगवानो।।

(गूपियि मंजलिस गूर गूर करान तु ग्यवुन वोतलान)

मर्द स्वर : मदकॅट मारुवुनि योदुवेश दारवनि।

(जसँदा मॉज्य नेरान स्व ति मंजलिस गुर गुर करान)

जसदा : शोद शांत दोद चूर।

जनानु स्वर : गूर गूर करयो!!

जसदा : त्वलसी छावय ही तन नावय।

जनानु स्वर : फलिलु मुश्कु कोफूर गूर गूर करयो।

जसदा : ही हरी हर पाफ हर कृष्णस कर।

जनानु स्वर : अनुग्रेह पूर पूर गूर गूर करयो।

(जसदा तु गूपियि नचुन करान)

जनानु स्वर : गूर गूर करयो! गूर गूर करयो।

(लय तेजान तु जसदा मंजस रटिथ गूपियन हुंद नचुन मोकलान। गाश
स्वतान तु शायिरस तु कट आवटन (सेटस) प्यठ स्पॉट लायिट गतु ग्यूर
करान। डाबर वायनुच आवाज उबरान। पतु रोनि गोसॉन्य संजुन रोन्न्य हुंद
सदा। रौद्र भावुच मौसीकी उबरान। गाश प्यवान खोचमुचन गूपियन प्यठ।

अथ्य मंज शंकर जी संज आवाज उबरान)।

शंकर : (जेठ रॉविथ) अ-ल-क्ष!

गूपी १ : हतय वाय! यि किछ आवाज!

गूपी २ : जसदा मातॉय! कृष्ण थव नी चूरि।

गूपी ३ : यिनय खोचि! वोठ कडि! व्योखुत आलव है गव!!

जनानु स्वर : तले नजर दीव! कुस छु यि अघोर स्वरफ गोसोन्य!!

(शंकर विंगु अंदर अचान तु प्रथ तरफु नजर त्रावान तु पनुन त्रिशूल

फिरवान)

शंकर : अ-ल-क्ष! अलक्ष!

गूपी १ : रोजी रोजी पथ बु हय वुछन! (वुछान)

जनानु स्वर : बोज कुस तु क्युथ छु!

(ग्यवनच मौसीकी वोतलान)

शंकर : अलक्ष! छिवना बोजान! अलक्ष!!

जनानु स्वर : परिपूरन छु नूरु बोरमुतये।

सूरु मोतुय आंगन चाव।।

जनानु कोरस : सूरु मोतुये आंगन चाव २

जनानु स्वर : शांत निर्मल ब्रॉथ कासुवुनये।

बासुवुनये सासरव जन।।

(सॉरिसुय स्टेजस जन तु वुजमल गाश प्यवान)

गूपी १ : शिव शम्भू अलक्ष बूलमुतये

कोरस : सूरु मोतुये आंगन चाव २

जनानु स्वर : नंगु बसमा अंगु मोलमुतये

हटि भुजंग जटि छस गंग

गूपी २ : डेकू च़ेदरम टिकू ज़ोलमुतये

कोरस : सूरु मोतुये आंगन चाव २

(ग्यवुन सोतान, गूपियि खोचान तु विंग अंदर अचान मंजुल ह्यथ।

शंकर डाबर वायान तु थदि हटि वनान)

शंकर : अलक्ष अलक्ष!

मर्द स्वर : डाबर वायान वीद परान

शिव चाव नन्दु गोर्युन आँगन।

(शंकर चकर दिथ बोन स्टेजस यिवान। गाश तस प्यठ प्यवान।)

नॉल्य रंडु माला अलख बोलवुन

कोरस (मर्द त जनि स्वर) :

आयो सदाशिव गोकुल कुन २

(गूपी ३ यिवान, शिवस बुछान, पतु ग्यवान)

गूपी ३ : हतय जसदोयी नेरी न्यबर ? जूग्यहय छु आमुत छयु नख बर ! दिस मोहरु, थाला नेरि गरुकुन।

कोरस : आयो सदा शिव गोकुल कुन २

(गोडु कर्य लॉगिथ, अथन मंज थाल ह्यथ जसदा नेरान विंगि मंज)

मर्द स्वर : योरु द्रायि जसदा प्रासा ह्यथ

मोहर तु द्यारव थाला ह्यथ।

जसदा : रटू रटू जोग्यो दिमयो ख्योन!!

कोरस : आयो सदाशिव गोकुल कुन २

शंकर :(लफुज लफुज वनान)

म्यनु मॉज्य गछनम दनु तय द्यार

म्यानि गरि रतनन हुंद्य छि अम्बार

मे गछयम कृष्णु बगवान हावुन ?

कोरस : आयो सदाशिव गोकुल कुन २

(जसदा खोचान! थाल पथर थवान। पतु कर्ख दिवान)

जसदा : क्याह! उँह! उँह!! न बा न बा।

(थाल तुलान तु वापस फेरान)

मर्द स्वर : यि बूजिथ जसदायि चुज कर्ख नीरिथ।

(गूपियि तस वलन यिवान)

प्रासुक थाल ह्यथ चायि फीरिथ

झसदा : नेरू नेरू जोगयो छुय नु रटुन!

कोरस : आयो सदाशिव गोकुल कुन २

(जसदा थाल विंग अंदर त्राविथ यिवान)

जसदा : अति बीज़न छुख चु बाशान

च्य वुछिथ यम केंकर छि खोचन

(खोचन कर्ख दिथ) नबा, नबा, हय क्या गोम!! किथु बनि दोदु शुर

खोचनावुन।

कोरस : आयो सदाशिव कूदस कुन २

(यि बूज़िथ शंकर कूदस मंज़, त्रिशूल नचुनावान स्टेजस चकर दिवान)

शंकर : अ ल - क्ष! अलक्ष! अलक्ष! अलक्ष!!

मर्द स्वर : बूज़िथ पॉनस ताम कति रूद

शाँत मनु ऑसिथ कति कूद

(विंग प्यठु वापस यिथ जसदायि मिखॉलिब। गूपियि जसदायि सुत्य सुत्य)

मर्द स्वर : वापस फीरिथ कोरनस कनन

आयो सदाशिव गोकुल कुन २

(शंकर लफज़ २ वनान) बोजी ? बोज़ी जसदाय नेर तय न्यबर। (त्रिशूल ह्योर

तुलान) जूग्य रुप आसय शिव शंकर!! (ग्यवान)

कैलास प्यठु आस करव दर्शुन।

कैलास प्यठु आस करव दर्शुन।।

कोरस : आयो सदाशिव गोकुल कुन २

जसदा : रातुक बालुक ज़ामुत म्योन

वोंदमस वॉरिव्युक तु मालिन्युक क्रोन

सुय दोदु शुर बन्या च़ेय हावुन ?

कोरस : आयो सदाशिव गोकुल कुन २

(शंकर जी पॉनस थर करान, त्रिशूल सोन अथन मंज़ रटान)

शंकर : मय रोज़ अज्ञॉन्य वारु थव कन

थोद तुलि बक्तयन गालि राखिसन

चोन बालुक छु पानु नारायण!!

कोरस : आयो सदाशिव गोकुल कुन २

शंकर : सतिमि फिरि दोरुनय रामु अवतार

सॉरिसय जगतस कोरुन व्यवहार

राज दितुन विभीशानस तु गोल रावुन

कोरस : आयो सदाशिव गोकुल कुन २

शंकर : ऑठमि फिरि दोरनय कृष्ण अवतार

कमसासुरसय करि समहार

दीवकी तु वसुदीव म्वकलावुन ।

कोरस : आयो सदाशिव गोकुल कुन २

(जसदा तु गूपियि छे पानु वान्य मसलहत करान)

मर्द स्वर : यि बूज़िथ जसदा पेयि पायस ।

(दवान तु खोनि मंज़ कृष्ण ह्यथ यिवान)

कृष्णु बालुक ह्यथ ओरु द्रायस

(शंकर कृष्णस थलि थलि वुछान ! शु तोरु वुछान)

कोरस : शिव जीयन तु कृष्णन कोरय दर्शुन !

(लय तेज़ान तु गूपि यि तिमन मंज़स रँटिथस नचुन करान)

कोरस : आयो सदाशिव गोकुल कुन २

ज़नानु स्वर : मोखु मोखु रुज़िथ

कोरस : कोरुख दर्शुन !

ज़नानु स्वर : सनम्वख रुज़िथ ।

कोरस : कोरुख दर्शुन !

सॉरी स्वर : आयो सदा शिव गोकुल कुन, गोकुल कुन ! गोकुल कुन !!

(वारु वारु मर्द : स्वर :)

शिव जीयन तु कृष्णन कोरय दर्शुन !

आयो सदाशिव गोकुल कुन !!

गूपी १ : हतय बाल कृष्णनि दर्म कोर असि ति भोलेनाथ सुंद दर्शुन ।

जसदा : अमिस शिव शंकरस वॅरिथ त्वता । वलिव सॉर ।

गूपी २ : वलिवी, पकिवी, पॅरिवी त्वता पॅरिवी सॉरी ।

गूपी ३ : तुलिव मे सुत्य सुत्य !

ज़नानु स्वर : परमु ब्रह्मो ! परमु शंकरो !

मर्द स्वर : जगदीश्वरो । बोविनय जय !!

ज़नानु स्वर : हरु हरु हरु गंगा दरो ।

मर्द स्वर : जगदीश्वरो बोविनय जय !!

मर्द स्वर : परमात्मु नीलु कंठु जटादरो ।

हनि हनि वंदयो पनुनुय पान ।।

ज़नानु स्वर : हर कास तु सॉरी असि अरसरो

कोरस : जगदीश्वरो बोविनय जय !!

(जसदा तु गूपियि छे कृष्ण जी तु शंकर जीयन पोश लागान)

जसदा : व्यश्नु रुप कृष्ण जी, भस्मा धरो ।

गूपियि : चॉनि व्यपकार चोन दारहोय दयान

कोरस : सतच वथ हाव हे सत् ग्वरो

ज़सदीश्वरो बोविनय जय

भोविनय जय, बोविनय जय । २

(सारी नचान)



माँज लागुन्य

प्रेम नाथ 'शाद *

माँज छे दुन्यहास मंज स्यटाह ब्रोटु प्यठय रेशस रंगनु बापथ तु दवा रंग्य इसतिमाल करनु यिवान आमुच । दुन्ययाहक्यन केंचन हिसन मंज ऑस माँज रुचर तु जाविदानी अता करनु वाजेन्य शय माननु यिवान । वेंदीम यूनानस मंज ऑस माँज हुसनचि दीवी (venus)लागनु यिवान । तु यि ऑस लोल, मुहँबत, हुसुन तु पाँकीजगी हुंज अलामत माननु यिवान । यिहूदी तहज़ीबस मंज छु माँजि यज़तुचि नज़रि वुछनु यिवान । यूरपकेन केंचन हिस्सन मंज छु माँज लागुन्य जान शोगून माननु यिवान । अरब तु बाकी इसलामी मुलकन मंज छि माँज ब्योन ब्योन मकुसदव खॉत्तु कामि यिवान अन्नु । अकि यूरपी हवालु मुताँबिक ऑस माँज जन्तस मंज लबनु यिवान । हज़रँति आदमन ओस अख माँजि पोश पानस सूत्य ज़मीनि प्यठ ओनमुत । हिन्दोसतानस मंज छु अम्युक वरताव लेदरि तु चंदनस सूत्य साँज सिंगरु बापथ पाँछ सास वरी ब्रोटु प्यठ सपदान ।

हिन्दुस्तॉन्य तहज़ीबस मंज छु माँजि अख खास मकाम हॉसिल । यिमव कोमव मुखतँलिफ दोरन मंज हिन्दुसतान पनुन गरु तु वतन बनोव तिमव ति रंग्य माँजि रंगस मंजुय पनुन्य आदात तु अतवार । यिहोय वजह छु जि अज़ ति छे सॉर्यसुय बरि सगीरस मंज माँज सिंगारुक सु अनसर यथ समॉजी पहचान तु व्यकार हॉसिल छु । माँज छे खेरो बरकतुच अलामथ ति मान्नु यिवान । माँज छे सॉर्यसुय हिन्दोस्तानस मंज खॉदर करन वाल्यन लॅडकन तु कोर्यन हुंध्यन अथन तु खोरन लागनु यिवान खासु अमूमन रोतलि लागनु यिवान छे तु अथ रॉच छि माँजि राथ वनान ।

हैध्य तु मुसलमान छि सॉरी माँजि हुंद इसतिमाल करान । वेंशीरि मंज छि अँहलि तशया लूख नव रोज़ तु ईदि गँदीर कि दूह माँज लागान । माँजि राथ छे हैध्यन तु मुसलमानन मंज खॉदरुच अख अहम रसुम माननु यिवान ।

कँह कॉशिर्य मुसलमान छि माँज जान शोगून मॉनिथ अजमीरु प्यठ अनान या कुनि सातु अरबु प्यठु ति अनान या अनुनावान । वेंशीरि मंज छे माँजि राथ ग्यवनुच गिंदुनच तु कुनि हदस ताम जज़बॉती ओसूदगी हुंज राथ आसान । कॉशर्यव बटन मंज छु महरेंनि तु महाराज़स माँज लागानुव अख खास फॉयदु । मास छे महरेंनि या महाराज़स खोर

छलान तु पतु छे प्वफ माँज़ लागान तँमिस छु कोरि हुंदिस मॉलिस माजि हुंदि तरफु तोम्नु थाल यथ प्यठ नून लिफाफु, डून्य, वॅर तु कैह नकदी रकम थवनु यिवान छु बतोरि शोगून दिनु यिवान । प्वफ छे सारुयनुय मेहमानन मंज़ माँज़ बाँगरान तु तिम छि अँमिस शोगून रँग्य कैह नकदी दिवान । ज़नानु तु न्वशि कोरि छे शोकु सान अथन तु खोरन माँज़ लागान ।

दपान छिना बदलाव छु कोनूनि क्वदरत । ज़मानु बदलनस सुत्य सुत्य छि खांदरन खुंदरन मुत्लक रसमु रिवाजन मंज़ ति कॉफी हदस ताम तबदीली नागुज़ीर । अज़ कालस मंज़ छनु माहरेनि गरस मंज़ बॅल्यकि ब्यूटी पालरस निशि गँछित अथन खोरन माँज़ि सुत्य नकश निगॉरी तु गुलकॉरी खुबसूरत पॉट्य मरनावनु यिवान । बाज़रस मंज़ छे माँज़ बंद लिफाफव अलावु लेप (paste) किस सूरतस मंज़ दसतयाब । रस्मु रिवाजन मंज़ नुमायान तबदीली बावजूद छु माँज़ि हुंद रिवाज ज़ोरु शोरु सान आम तु यि रोज़ि हमेशि कौयिम तु दौयिम ।

अकसर शॉयरव तु अँदीबव छु पनन्यन तहरीरन मंज़ माँज़ि हुंद ज़िकिर खूबसूरत लफज़न मंज़ कोरमुत ।

माँज़े माँज़े माँज़ि फोले टूरी

माँज़ आयि स्वरगु पूरीये

या

टूट के जाल से हाथूमें बिखर जाती है

यह तो महँदी है महँदी तो रंग लाती है ।

अँपील

अँस्य छि अँदीबन गुजॉरिश करान ज़ि तिम सूज़िन पनन्य ताज़ु छोट्य लेख, अफसानु, शॉयरी, तबसर, अदबी खबरु बेतरि वाखस मंज़ छापनु खॉतरु ।

वाख पॅरिव तु परुनॉव्यूख बाकी । परन वॉल्य सूज़िन पनन्य राय तु सुजाव ।

वाखु गोछ गरु गरु वातुन! वाखु खॉतरु सूज़िव तु सोज़नॉविव चंदु ।

वाख-परिवारस दियिव वुसजार । यि छु तुहुंद पनुन मैगज़ीन ।



ईद

रूप कृष्ण भट

ईद छु मुसलमानन हुंद अख अँहम तु अज़ीम मज़हबी बोड दोह। ईद छे लग-बग सॉरयसुय दुनियाहस मंज़ बडु जोशि खरोशि सान मनावनु यिवान। ईद मनावनुक मकसद छु कुनुय मगर मनावनुक्य तोर तरीकु छि अलग-अलग जायन हना मुख्तलिफ। वँशीरि मंज़ येति ज़न वारयाह तिवहार तु बँडय दोहु मनावनु छि यिवानु छे ईज़ अख खास अहमियत हॉसिल।

ईज़ छे ज़ु आसान। ईद-उल-फितर तु ईद-उल-ज़ुहा। कॉशिर्य छि ईद-उल-फितर ल्वकुट ईद वनान तु ईद-उल-ज़ुहा बँड ईद वनान। ईद-उल-फितर याने ल्वकुट ईद छे माहि रमज़ान याने रोज़दँरी खत्म घछनु पतु मनावनु यिवान तु ईद-उल-ज़ुहा याने बँड ईद छे अमि पतु द्वयि रेत्य तु दहि दोह्य मनावनु यिवान। ल्वकचि ईद पतु छि मुसलमान हज करनु खातुर रवानु सपदान तु बजि ईद ताम छु हज मुकमल करनु यिवान।

योताम ज़न ईद मनावनुक तोलुक छु दशवय ईज़ छे बडु दुम-दामु सान मनावनु यिवान। ईद छे लूकन हुँदि खॉतरु अख खोशी हुंद पॉगाम ह्यथ यिवान। कँह दूह ब्रॉह प्यठय छि लूख ख्वश आसान तु ईज़ हंज़ तयॉरी शोरू करान। लूख छि नँव्य-नँव्य प्वशाख मँल्य ह्यवान। पनुन्य गरु क्यो औद पोख साफ करान। यारन, दोस्तन, हमसायन क्यो रिशतुदारन किथ्य त्वोफ तु मिठॉय मँल्य ह्येवान। च्वपॉरय छि नँव्य-नँव्य बाज़र सजान, बाज़रस छे रोनक कयो सजावट करनु यिवान। शुरय कयो बँडय सॉरी छि ईज़ हँदि इसत्यकबाल खॉतरु बेकरॉरी सान इन्तिज़ार करान। ज़नानु छे वारयाह दूह ब्रॉह प्यठय ईज़ बॉथ गयवान तु रोफ करान आसान।

“ईद आयि रसु- रसु, ईदहाग वसुवॉय”

यि बॉथ छु च्वपॉरय ग्रज़ान आसान। ईज़ दूह छि लूख दुहकि मुकाबल सुलि व्वथान। अथु - बुथ छँल्यि तु चाय- वाय चैथ छि मर्द न्यमाज़ परनु खॉतरु ईदगाह गछान। वारयाहव जायव प्यठु छि लूख यिवान तु अँक्यसुय जायि सँमिथ ईदगाहस या कुनि बजि मँशीदि मंज़ यिकवट न्यमाज़ परान। ज़नानु छे गरन मंज़ ख्यनु चनुकय चीज़ तयार करान। शुर्य छि बाज़र सजावान तु मुख्तलिफ खेलन हुंद इन्तिज़ाम करान। न्यमाज़

परनु पतु छि लूख अख अकिस मुबारख बाद दिवान तु नालु मति रटान । दोयम्यन फिरकन हुंघ लूख ति छि मुसलमान बायन मुबारख बाद दिवान तु तोफु पेश करान । मुसलमान छि पनन्यन बटु बायन साल तु सबु करान । च्वपॉरयु छु शोशी हुंद माहोल आसान ।

शुरेन हुंदि खॉतरु छे ईद अख खास खोशी हुंद दूह आसान । य़िम छिनु कुनि व्यचान । तिमन छुनु कुनि कुसमुक रोट बासान । शुरेन छु बडेन निशि ईदयानु याने ईज खर्च मेलान । तिम छि अमि दोहु बे वायि पॉठय खरुच करान । ज़नानन हुंदि खॉतरु ति छे न ईद केंह कम दिलचस्प आसान । तिमु छे दोहु दिशिचव गुरु काम्यव निशि ज़्यादय पहन आवरि आसान । तिमु छे शीरिथ तु पुरिथ नेरान । पानु वॉन्य हिकचि करान, रोफ करान तु गिन्दान ।

ईज दोहु छि अमीर लूख गरीबन सँदकु याने अकि वॅस्मुक मदद दिवान, ताकि तिम ति मनावन जान पॉठय ईद । ईद लफ़ज छु व्वन्य आम बोल चालि मंज चामुत । येमि दूहु काँसि जान ख्यन-चेन मेलि या जान पलव प्वशाक लॉगिथ आसि, सु छु वनान 'अज़ छे मे ईद' । येलि काँसि यड़ बॅरिथ ख्यन-चेन मेलि, लूख छि वनान 'तस छे अज़ ईद' । अति छु ननान ज़ि ईज छु खेनस चेनस तु आम खोशी सुत्य वाठ । अख मशहूर फारसी महावरु छु ज़ि, "ईद रोज़ नेस्त कि हलवा मे ख्वोरम" । याने ईद छे नु दोहय आसान ज़ि हॅलवु ख्यमव ।

ललु वाख

मनु-मनु गॅयस बो तस कुनुय,
बूज़म सतुच घंटा वज़ान ।
तथ जायि धारणायि धारण रॅटुम,
आकाश तु प्रकाश कोरुम सरु ।।



मूती लाल साकी

रूपकृष्ण भट

काँशिरि ज़बॉन्त्य हुंद माया नाज़ अदीब, शाँयिर नकाद मोहकिक, तरजमुकार तु अख मँछयुल इनसान मूती लाल राजदान “साकी” ज़ाव सिरीनगरु प्यठु लगबग वुह किलोमीटर दूर अँकिस ल्वकटिस गामस माहनूरिस मंज़ जुलाई 1936 मंज़। यि गाम छु च़ोडरिस नँज्यदीख, बडगॉम्य ज़िलस मंज़ तु च़ारि शरीफ वति प्यठ वाका। साकी छु पनुनिस ल्वकचारस मुतलक पनुनि स्वानीह “शिहिज वथ” किताबि मंज़ वनान, “म्यानि माजि प्यव सोरुय स्वन, गँहनु तु पश्मीनु पलव कुनुन योत ताम मे मेट्रिक पास कोर। मोल ओसुस ल्वकटिसुय स्र्वगवास गोमुत तु असुंद सोरुय बार ओस माजि प्यठुय। गरीबी हुंद हाल ओस यूत ज़ि नँव्यमि दँहमि जमॉच मंज़ ऑस्य अलु पलु अरदाह मील पयदल कडुन्य पेवान।” मज़ीद छु लेखान ज़ि जवॉनी सोरनस ताम वुछ मे बेपनाह गरीबी तु नोकरी मेलनस ताम ओसुस नु पय ज़ि लेम्य त्रेश क्या गँयि।” ल्वकचारु प्यठु जवॉनी ताम छु तँम्य ज़िंदगी हुंद प्रथ कांह चुयुह कशमकशस मंज़ गुज़ोरमुत।

साक्यस ओस पनुनिस आबॉयी गामस सुत्य बेपनाह मोहबत। तस ऑस गॉमी ज़िंदगी काँफी प्रेयिवुन्य तु ख्वश यिवुन्य बासान। तस ओस गॉमी बाशंद आसनस प्यठ फखुर। अतिक्य विरिवार, दांखाह, बोनि शहजार, क्वलु तु मरगु, सबज़ार तु कोहसार अख अँक्यसुंदि खोतु प्रेयिवुन्य तु मॉर्यमँदय। तस ओस पनुन्यन हख हमसायन सुत्य काँफी व्वथुन बिहुन तु लगाव। मुसलमान तु बटु ऑसिस दून चेशमन हुंद गाश बासान। तवय ऑसिस साँरी बटु क्यो मुसलमान अलनु वलनु यिवान। साक्यन छु पनुनि सवानिह मंज़ वारयाहन हख हमसायन हुंद नाव फखरु सान वेछुनोवमुत। तस ओस काँशुर आसनस प्यठ ति वारयाह फखुर। कँशीरि बापथ तसुंद लोल छु साक्यिनि शाँयरी मंज़ अयान तु व्योद। “नीर्य नगमु” किताब छे अमिच गवाह तु मिसाल। साक्यस ओस डयेकु फवलवुन तु वुठन पेठ ओसुस हमेशि असुन फवलान। ठह ठह करान ओस आसान तु बडि बडि ओस कथु करान।

साकी रूद वॅंशीरि हंज़ि तरकी अलमी, अदबी, समॉजी तु सकाफती तँहरीकी मंज़ अँहम किरदार अदा करान। सु ओस कश्मीर कलचरल आरगनयज़ेश चन सरगरमियन मंज़ स्यठा सरगरुम। साकयस छु माजि अलावु पनुनि बेनि यस सु बेनिगॉश वनान ओस तु य्वस ल्वकरय गुज़रेमुच्च छे सुत्य ति कॉफी लगाव रूदमुत।

साक्यन करि अयाल पालनु बापथ ल्वकयि म्वकयि नोकरी गरा ग्राम सेवक तु गरा बेयि कैह, ऑखर वोत रेडियो कश्मीरस मंज़ येति सु बहँसयति सीनयर एडिटर मंज़ रिटायर गव।

21मई1999 मंज़ गव मूती लाल साकी दिलि मंज़ पनुनिस नेचिविस विजय साकयिनिस गरस मंज़ यथ फनॉयी दुनियाहस लथ दिथ। साकी छु पनुन्य सवानिह मरनु सुती शोरु करान। सु छु वनान, “मॅरिथ गछु बु बोनि तल ज़ालुन तु म्योन सूर गछि बोनि मूलन ख्योन दयुन ज़िंदगी मंज़ दयुत मे द्वयव चीज़व सहारु अख माजि तु बेयि बोनि। अवय छुस माजि तु बोनि हिशी कदर करान।”

अफसूस साकयिन यि खॉहिश गॅयि नु पूर। मगर भगवानस ओस बदलुय मनज़ूर, 1990 मंज़ प्येव साकयस ति बाक्य बटन सुत्य चलुन तु थख कोडुन उदमपोरु। मई रेतस मंज़ गरमु चंजन मंज़ ओस तस प्राण त्रावुन्य तकदीरस

लीखिथ येति बून्य तु बोनि शेहजार सिर्फ बटन कॉशर्यन हुंद्यन खाबन तु ख्यालन मंज़य ओत ओस।

साक़ी बहसियति कलमकार :

अदीब शॉयिर, नसर निगार, नकाद, मोहकिक, तरजमुकार, ओपेरा लेखन वोल, अंदाज़ु लगॉविव यिम सॉरी सिफत तु खताब यस इनसानस सुत्य लॉगिथ आसन सु कोताह बोड सॉचन समजन वोल तु ग्वनवान नफर गछि आसुन। आ पज़र छु यिय ज़ि मूती लाल साक़ी ओस स्यठा पायि बोड इनसान तु अदीब। अँम्य छु अदबुक्यन सारिनुय सिनफन प्यठ पनुन कलम आजमोवमुत। साकी ओस वॅंशीरि हुंदि हुसनुक कदरदान तु अतिव्यन रेशन तु सूफयन, संतन क्यो ग्वनवानन हुंद पज़ॉर्य पनुनि तखलीकी सफरुच दासतान बावान बावान छु साक़ी जज़बॉत्य गछान। सु छु लेखान “बु आसुहॉ चूरमि जमॉच्च हयुव परान येलि मे गुंगरावुन हयोत। अमि पतु येलि मे दँहिम जमाथ पास वॅर बु रूदुस बेकरार तु ओसुस देहय दोहस मालु करान। मे शॉयिर बनावनस मंज़ छु म्यानि माजि तु बेनि हुंद खास अथु। दोयमि ओसुस परान ज़ि तमि अनुनोवनस कलामि मँहज़ूर

न.6। स्व ऑस परान तु चायि चाफ" (शिहिज वथ)।

साकी सॉबनि त्रे ल्वकचि ल्वकचि किताबु छपेयि अरिजसॉबस तु वासदेवस सुत्य यिमन नॉदयमन तु रॉहियन ग्वडु कथ ऑस लीछमुच। तसुंज बाजॉबतु ग्वडनिच शारु सॉबरन ऑस "मोदुर्य खाब" तु तमि पतु "मनसर" तु "नीर्य नगमु"। दपान चाटुहालस मंज ओस जूहामि स्कूलस मंज तस नामवर शॉथिर तु नकाद अबदुल अहद आज़ाद ति माशटर रूदमुत। आज़ादुन असर छु साकी सुंदिस सॉचस प्यठ गोन। सु ति छु आज़ादनी पॉठय इनसानस सिर्फ इनसान मानान नॅ कि बटु या मुसलमान।

साक्यस ओस कोशुर आसनस प्यठ फखुर तु खासकर पनुनिस पोट कालस प्यठ। वनान छु "कॅशीर करया ज़ाँह दुबारु अभिनोगुप्त, कलहन, शेख याकूब सरफी तु मला मोहसिन फानियस हिव्य नावदार शखुस पॉदु। सयॉसी मॉदानस मंज ओस तसुंद वनुन ज़ि ललता दित्य, अवनती वॅरमन, शहाबुदीन तु बडुशाहस पतु छु शेख मोहमस ओबदुलाह वॉहिद शखुस येम्य कॅशरिस तवारीखस अख नोव मोड दयुत।

साकी सॉबन छे च़तजीह ज़्याद किताबु तॅहरीर करिमचु। अँहंज़ि "मनसर" नावु शॉयरी किताबि आव साहित्य अकादमी अवार्ड दिनु तु अँलमी तु अदबी खँदमातन बापथ आस पदम श्री एवाड दिनु। बकोलि प्रोफ. रतन लाल शांत "साक्यस ओस कॅशरि ज़बॉन्य तु अदबस सुत्य देवानुवार मोहबत। साकी सुंद यादाश ओस मिसॉली। साकी सुंज़ि ख्वद एतमॉदी मंज ओस तसुंद यादु वोतरयुक अँहम रोल आसान"। मे छु पानस ति अमि कथि हुंद ज़ॉती तजरुब। तस युस ति कांह सवालु अदबस मुतलक प्रछुहाव सु ओस फोरन जवाब दिवान तु मिसालव तु दॅलीलव सुत्य तमिच जवॉज़्यथ बयान करान। बु ओसुस तस "चलता फिरता एनसयक्लो पीडयि" वनान। येलि अँस्य नमतुकिस दॅहलिस मंज पनुनिस बुडयबब वेष्नु राजदान निस कलामस यकजाह कॅरिथ किताबि शकुल दिनु ऑस्य यछान मे कौर तस निश ज़िकिर ति मव वनि तस मुतलक वारयह कथ पतु येलि ति म अकि दवह अकिस सेमिनारस मंज मे निश पटियाला आयि मे त्रोव सुमसवदु ति म न ब्रॉठकुन ति म गॉयि स्यठा ख्वश तु दोपुख बु लेखु अथ प्यठ कॅह। मे त्रोव यि मसवदु यिमन निश ग्यसट हावसस प्यठ। सुबहन येलि बु यिमन निश गोस यिमव पिलुनोव सु मसबदु मे। अथ ऑस यिमव नफीस ग्वडु कथ लीछमुच। अति बास्योव पज़ी ऑस यिमन राजदान सॉबुन्य वारयह ज़ानकॉरी।

साकी संज्व अँहम तखलीकव मंज छि “कुल्याति शेखुल आलम, कॉशुर एनसयकलो पीडिया, कलामि परमानं, जिलद 1 तु2, कॉशिरय लुकु बॉथ ६जिलद, आगर नेब, मन सर, नीर्य नगमु, शिहिज वथ कॉशिर सूफी शॉयरी जिलद 1-2 कुल्याति समद मीर, वगॉरु शॉमिल।

साक्यन छि वारयाह ओपेरा ति लीख्यमित यिमेन मंज परी मँहल स्यठा मशहूर छु। अकादमी हुंजि नोकरी दोरान वॅर यिमव कॉशिरि अदबतु ज़बॉन्य बापथ वारयाह कॉम तु वारयाहन बडयन प्रोजक्टन सुत्य रूदय मनसूब। यिमव कोर वारयाह तरजमु ति। यिहुंदिस तरजमु अदबस मंज छि राबिंदर नाथ टैगोर सुंद “डाकगुर” जान कीटस संज्वन चिट्यन हुंद तरजमु तु कलहन संजि “राज तरंगनी” हुंद तरजमु शॉमिल।

साक्यन वॅर कॉशिरिस फोकलोरस प्यठ वारयाह कॉम। बकोलि गुलाम नबी आतश मॉहिरि फोकलोर क्यो मशहूर तु मोरुफ अदीब, “मूती लाल साकी छु ग्वडन्युक चुक्यदर कॉशुर येम्य कॉशिरि फोकलोरचन मुखतलिफ वनुत्य ज़ॉचन हुंदय राद तु होंज चीन्य तु मीन्य। अथ सरमायस तह तु त्रेहु दिनु बापथ होल गोंड। फोक लोर ओस साकी सुंद वुरुन व्वथरुन। तँम्य कोर फिर्य फिर्य अथ सरमायस लरि ल्वह।

ज़िंदगी हुंदयन ऑखरी बॅरयन मंज ओस खानु बदोशी हुंद रावन त्योल तस रुमस रुमस तेलान। दपान ओस सेरु वावु खोतु छु डेरु वाव स्यठा कूठ। साकीसंजि सवानि उमरी मंज छु यि टाकारु पॉट्य अयान जि तस ओस वॅशीरि निशि दूरयर जिगरस सन्योमुत सु छु वनानः

सूर म्वठ सपदिथ ति वेथि मंज बॉव्यज्यम

बे वतन मरनुक्य दिनम यिनु तानु लूख

सु सूर वोताह वेथि ति हयकव नु वॅनिथ मगर अख कथ छे टाकारु जि तँमिस लोलु मँत्सि तु प्रकृच हुंदिस पुजॉर्य साकी सुंद रुह आसि वॅशीरि मंज आरन तु मरगन, बागन तु कोहन मंज हिकचि करान।

साकयिनि कलामुक्य कँह नमुनः

१. बहारुक वख तु बेयि गोछ जाम आसुन
- चवदॉहिमि जूनि हुंद गोछ शाम आसुन
- शबाबुक्य नगमु गॅछय आसुन्य नटयन प्यठ
- मे गोछ बेयि ब्रॉठकनि गुलफाम आसुन

२. गनीमथ शामि गम रोऽया नँ रोऽया ।
तँमिस जुलफन सु खम रोऽया नँ रोऽया ।
चेयिव वुन्यक्यन छु जॉहिद बांबरयोमुत
खबर छा सुबुह दम रोऽया नँ रोऽया
३. चे आसी पय छि किथ्य आसान स्वखुक्य द्वह
गमुय गम आम बुथि थोवहम वॅरिथ त्वह
वथय ज्रांह लॅज नु सौतस सानि आंगुन्य
नँ पॅटुय बामन नँ ज्राँह सोर्योव कृहुन प्वह
४. यिनु सॉ लॉग्यहूम पज़रुच हाछ ।
यथ समयस आव अपजुय रास
५. छि असुवन्य तु गिंदुवन्य यि सॉन्य पोशि वॉर
म्वलुल म्वखतु डल अथ व्वगुन्य रोज़ि कॉर
समुत सोन करि दुशमनस लारु लार
हिमालुक्य गबर रॉछदर बेशुमार
६. अच्यथ सपदुन छु प्रावुन परमु आनंद
अकालस लीन सपदुन शाह करुन बंद
न्यराकारस छु आकारुय करान छा़य
छु मुश्किल नाशि रोस प्रागाश निसपंद
७. सयासत कार बन स्रवीग स्रोग छु बापार
जरूरत छे नँ खरचावन्य चंदुच हार
वुछख येति युथ ततयन त्युथ पॉथरा लाग
अँती गेन्य लद अँती कर तोतु गुफतार
८. बु छुस कॉफिर करान छुस बुत परस्ती
अँछन तल छुम सनम रोऽया नँ रोऽय ।

९. सँजदु कस कस करख तु थावख हयेस
प्रथ जमानस ख्वदाय बदलान वुछ ।
१०. म्यानि क्वछि मंज नफरतस छनु जाय कांह
बदखाहन छनु रेथ्य गरस मंज पाय कांह
११. यवहय आदम अरस्तो आदि शंकर
यवहय आदम मोहमद हयुव पयमबर
यवहय आदम छु चीरान आदमस ह्युर
यवहय हिटलर यवहय चंगेज सीजर

ललु वाख

तेम्बुर पेयस कव नो चॉजिन,
मस-रस कव अह नॉजिन गव,
शान्त्यन हँज क्रय तोलु म्वलु वॉजिन,
अँदुर्य गाह येलि न्यबर प्योस ।।

ललु वाख

बबरि लंगस मुशुक नो मोरे,
हूनि बस्ति कोफूर नेरि न ज़ांह ।
मनु योद गारुहन फेरिय ज़ेरे,
न तु शालुदुंगे नेरिय क्याह ।।



ऑनख

रतन लाल शान्त

बस युथुय सिरीनगर शहरस चायि, सु ह्योतुन बेकरार गछुन, सु छु गरा दँछिन्य तय गरा खोवर्य दार्यव किन्य वुछान। खबर क्याहताम छांडान, परजनावनयच कूशिश करान, खबर क्याहताम लबनु खॉतरहि पनयनि ज़ लर्यव बाज़रव दुकानव तस वति पकविन्यव लूकव पेटय तेज़-तेज़ फिरनावान। अँमिस दँछिन्य खोवर्य सवारि आसु बज़ॉहिर अँम्य सुंद यि मच़र वुछिथ कँछाह हॉरान तु कँछाह तंग आमच़ मगर तिमव आसिहे यिति च्यूनमुत जि नफर छु या तु वारियुह कॉल्य या ग्वडनिचि लटि कँशीरि आमुत। तिमु आसहॉन दपान मु कँर्यूस कँह, पननिस कॉसि आसि वँन्य दिवान। तिमव आसिहे यिति वुछमुत जोमि प्यठु योत ताम ओस यि दोह्य दूहस छवपु कँरिथ तु बेहरकथ बिहिथ। न कँरन कॉसि सुत्य कथय न वोथ सीटि प्यठु ब्वनय ज़ांह। कॉसी वोनस न कँह।

अँती दिच़ तँम्य बडि हटि ड़ायवरस क्रख - रुकाव साँ व्वस्ता, मे त्राव साँ येती।

सु गव यखदम बसि प्यठु ब्वन वँसिथ तु गव अँकिस पी-सी-ओ दुकानस खँसिथ। पांचन दँहन मिनटन कँरन फोन करनच कूशिश, मगर नम्बर ओसुस नु रलान। किन् रलान ओसुस ति सुय ओस च़टान ? अख कथ ति कँरन नु।

तँमिस गँयि कनन आवाज़ मैटाडोरुक (सिटी बसि हुंद) कंडक्टर ओस हख दिवान रयन्यवोर, रयन्यवोर...

व्वन्य गव सु हुशार हयू। सु ह्योतुन दुकान प्यठु ब्वन वसुन। दुकानदारन होवुस फोनकिस मीटरस कुन इशारय। तँम्य कजि रवपयि च़तजी कौंटरस प्यठु त्राँविथ गव ब्वन वँसिथ तु स्योदुय गव रयन्यवॉर्य मैटाडोरस खँसिथ।

मैटाडोरस मंज़ ति ह्योक नु सु कच़ि बिहिथ। बेयि छु तिथय कँन्य सीटय प्यठु वँथ्य वँथ्य गछान तु दँछिन्य खोवर्य दार्यव किन्य वुछान। ओवरलोड खडा सवार्यव मँज़्य कलु कँडय कँडय ति सीटन प्यठु बिहिथ सवार्यन प्यठु नोम्य नोम्य। शायद ऑस मैटाडोरस मंज़ न कॉसि फुर्सथ न ओस कॉसि परवाय जि यि नीम बुज़र्ग क्याह वति वति शुर्यन हुंद्य पॉठय वोथ्य वोथ्य गछान।

अँती दिचन ऑँद्यकी पॉठय ड़ैवरस बडि क्रख व्वस्ता, लोतय पहान। मे त्राव साँ येती।

यिथु कॅन्य बडि क्रख बूजिथ दिचु ड्रयवरन यखदम ब्रेक। सु वोथ थोद तु गव सवार्यव मॅज्य ब्वन वॅसिथ। सु खॉली बैग त्राव्योन गाडि हुंजि बीरि बीरि मंजय, युस गरि नेरनि विजि द्रहय फेकिस अलौद त्रावान ओस। पॅत्य किन्य लॉयिस वॅम्य ताम क्रख ति बैग द्युतनस दॉरिथ, युस तॅम्य द्रशिवन्य नर्यन प्यठ रोट।

सु चाव अँकिस कोचस तु छु पकान।

सु छु पकान, रुकान तु कुनि मकानस ब्रौह कनि खडा गछान।

सु छु कुनि दुकानस खसान, दुकानदारस थलि थलि वुछान। दुकानदार येलि इशारस मंज प्रछान छुस क्याह गछी, सु छु मोयूस हू गॅछिथ वानु प्यठु ब्वन वसान कदम दिवान।

सु छु तिमन तंग कोचन ति अचान यिमन अमि विजि खालय कांह पकान आसान छु।

सु छु तिमन बाजरन मंज खडा गछान येति व्वसु द्रव्सु तु बीरु छे तु दकु सुत्य छु सु गरा दॅछिन्य ति गरा खोवर्य लायिनु यिवान।

अँती गयि तॅमिस कनन फोनच रिग। सु गव अँकिस नजदीकी पी-सी-ओहस खँसिथ। टेबलु प्यठु तुलुन अख रसीवर तु लोगुन कनस। वानुवॉल्य होवुस इशारु सुत्य चंदस कुन जि रिग छय मोबाइलस गछान। हॉरॉनी मंज फॉलेयि हिशि तॅमिस बुमु। दँस्ती कोडुन चंदस अँदर फोन तु लोगुन कनस हैलो। तॅम्य परजनाँव आवाज। यि ऑस अँमिस ज़नान बोलान।

... हे चु कति सॉ छुख। फोन क्याजि ओसुय बंद थोवमुत। डायल करान करान आयम ऑगजि गसन। मेय वोनमुत ओसमय अज यिजि सूली पहान। गरि नीरिथ छुय नु चे पतु गरच यादय रोजान ... यिमन आव नु कुकू जी वुनि ति गरु वापस। कोलन हसॉ। पंदाह गंटु गॅयख तु वुनि छुख नु किंही ननान। ज़न तु वुद्विथ गव बिचोर। मँहॅल छु सम्योमुत। पुलीस ति आव बेयि छुयि यादय, अपॉरी गॅछिजि ऑनकु वॉलिस ज़रूर तु काकनि हुंद ऑनख हेज्यस....

सु प्यव ज़ननस। आ काकनि ओस सुबहनस ऑनकु वरॉय आंगनस मंज दब लोगमुत। ...हमसायन ओस लॅडकु राथ शामु प्यठु गॉब।

अँती पेयि तॅमिस पानस प्यठ नज़र। बैग फेकिस त्रॉविथ द्रायोव सु सुबहस गरि ... अज ति द्रहदिशिक्य पॉठय ... अमा सु कोत वोतमुत...

सु छु अँद्य पॅख्य नज़र त्रावान। सु छा तोतुय वोतमुत योत सु द्रहय गछान छु किनु कोत। ... तस हेतिन कनन अंदर ज़नानि हुंद यिम लफ़ज़ु ग्रजन्य ... पंदाह गंटय ... क्याह तस गॅया पंदाह गंटय गरि द्रामतिस पंदाह गंटय गॅया तस ... यथ मँहलस, यिमन

कोचन बाज़रन तु लूकन ताम वातनस, यिम नय तस परज़नावानय छि ... न न पंदाह गंटु
गँयि कोल हंदिस कुकू जियस ... मगर पानु कोत आव सु योर... क्याह करनि क्याज़ि ...
किनु ... यि मा छु ... हांह ..

तँमिस ह्योतुन चकर युन । सु ब्यूठ वानु पँजि अँकिस प्यटु ।

तँम्य दिच पानस दुनन । व्वन्य ह्योतुन गोरु सान च्चवापॉर्य वुछुन । सु कति छु
वुन्यकिस । मगर तँमिस पय छे । सु अय यिमन सारिनय लुकन ज़ानि... यिमन क्या सना
गोमुत... तस कुन न वुछानयकांह... ज़न नु ज़ाननुसय...

तँम्य छुन चंदस अथि । अति आस नु ऑनख अथी । सु आसि मैटाडोरस मंज़
प्योमुत । दप्योन वारु वुछख तु बदि कडख यिम अकि अकि ... ह्यौवु ...

तँमिस पेयि हंगु तु मंगु अँकिस नॉरस कुन नज़रु, युस अँमिस ब्रूठय किन्य नस्ति
स्योदुय द्राव । तँमिस बासेयस द्वशिवुन्य अँछन अंद्य अंद्य ज़न दित ज़ून पेमच । आरु
क्वंडल हिव्य ऑसिस । जन ति शीशव रोस्त ऑनख लोगमुत ओसुन । व्वन्य वुछ तँम्य
बेयिस नफरस कुन । तस ति बासेयस यिथि आरु क्वंडल अँछन पेमत्य । ज़न ति ऑनख ।
बेयिस ति बेयिस ति... यि क्याह सारिनय ज़न बदलय ऑनख हिव्य लॉग्यमुत्य । यिमव
किन्य मा छिनु यिम वुछानय कँह.. किनु तँमिस छु नु पानुसुय ऑनकु वरॉय लबनु यिवान
कँह...

तँम्य दोप यि गँयि म्यॉन्य हालथ तु काकनि क्याह वँनिजि... ओह काकन्य... ओह
कुकूजी....

तँमिस हेतिन व्वन्य ऑरख फटुन्य । व्वन्य कपॉर्य नेरि येमि बाज़रु न्यबर । दोपुन
प्रछना काँसि, मगर कस । तँम्य त्रोव व्वश... वाह्य, संद्या वख ह्योतुन वातुन... ज़नानि
हुंज कथ ऑसुस कनन अंदर ग़ज़ान... गरि नीरिथ छय नु गरच़ यादुय रोज़ान ।

तँ मे वचि अँछ ... भगवानु मे वातुनावतु कुनि पॉदय गरु ।

ललु वाख

कवु छुख दिवान अनिने बछ ।

त्रुख हय छुख तु अन्द्रुय अछ ।

शिव छुय अँत्य तय कुन मो गछ,

सहज़ कथि म्यानि करतो पछ । ।



त्रेयि त्रह क्रोर दिवता

मखनलाल पंडिता

जोम यिथ पयव शाम लालस गोडन्युक वासतु खॉराती लाल दुकांदारस सुत्य। खॉराती लालन ओस किरयानस सुत्य सुत्य व्वन्य दोद ति थोवमुत यथ सॉरी ऑस्य तॉरीफ करान। अमि सब ओस सुबुहकिस पॅहरस तुसंदिस वानस पयठ रश रोजान। यिथकन्य असि आदथ छु सॉरी ऑस्य लोट्ट बॉह कुन कॅरिथ 'गोडु मे गोडु मे' करान आसान। मगर तॅम्य करनॉव्य तिम लॉन तु पननि वारि ओसुख लिटरनि मगु सुत्य दोद फिरान। दोदु खॉतरु ओस शाम लालस दोहय तॅसंदीस वानस पयठ गछुन पयवान तु लॉनि रूजथ दोद अनुन पयवान। वारु वारु तुलुन बाकयु सोदा सलफ ति तॅस्य निशि। खॉराती लाल ओस रुत नफर तु ग्राकन सुत्य ओस असवुनि हॉजि पेश यिवान। तसंदि खोश खोलकु ओस शाम लालस सु पननिसुय गामुकिस अमु वॉनिस हुवुय बासान। यिथ कॅनि बढ्योव तिमन पानु वॉन्य सख यखलास।

अकि दोह येलि गरमु क्राय ऑस तु वति पकनस ऑस सुबहॉय ऑरकु छुट्ट गछान, शाम लाल दराव खॉराती लालस निशि दोद तु गर सामानु अननि। लॉन ऑस ज़ीठ तु खॉराती लालस ओस वुनि अथु आवुर। लिहजा खोत सु वानस पयठ। बुथिस तु नरयन व्वथरॉविन कमीज़ि दामनु सुत्य ऑरक, पखस तल ब्योठ पान शयहलावनि योतान्य बीरु हमययि। अथु मोकलिथ पिलु नोवनस लोट्ट तु सुती व्वोनस, 'गरम छु सख'। तस ऑस खबर खॉराती लालस गछि तसुंद मोसूस तु वन्यस, 'आ गरम छु सख'। मगर तॅम्य वोनस नु किंहय। सु कॅह वनु नावनु खॉतरु व्वनुस तॅम्य बेयि, 'खबर कमन पापन हुंद डंड, भगवान गोव च़खि अंसय लॉगिन यिमन तापु च़ंजन यथ नु असि हॉल ऑस'।

खॉराती लालस ति आयि मसा मसा ज़बान। तॅम्य वोनस, 'पंडत जी! सोय सारनयु छु रछान सु गछया च़खि,'

'तयेलि मा छु असि कांह दिवताह च़खि गोमुत, 'तॅम्य व्वनुस असवुनि बुथि। 'तथ हयेकय नु बु कॅह वॅनिथ,' खॉराती लालन वोनस तोरु असान असान। 'दिवता छुख नाव मगर च़कि छि असी हिव्य। कुस नु कार छु कोरमुत तिमव। गोतम रेश खयेवुन रॉच़ पहरन फयेख।'।

‘सु गोछ ना यँदुर पदवी निशि बदर करन ?’ तँम्य वोनुस ।

‘कयाह वनव कांह मा आसयस चयथ रछान, यिथ वँन्य अज़ छि यिथय्न रछान ।’

‘पोज़ छु, तोबु ! तोबु ! दपान तैयित्रह करोर दीवता छि ।

यिम कम्य आदमन गँज़रॉव्य । अगर नाव हयेनि बयेहमिव वुंबुर गछि अँथ्य सुत्य ।’

खॉरॉती लालन वँरुस बेयि असनु हना, दोपनस, वुछ कथ छुख सन्योमुत । मे गछन खॉलिस त्रेय खोश रवजुन्य । अवल गो श्री गनेश जी, सु छु थरुक मॉलिख दोयिम माता सरसोती स्व छे अकलि हुंज़, त्रेयिम गँयि माता लखमी स्व छे दनुच । त्रयि त्रहन करोरन दिवताहन क्या छु असि करुन ?’

शाम लालस बासयोव खॉराती लाल छु पोज़ वनान । यिमय त्रेय गछन खोश रोजुन्य यिथ वँन्य अँमिस छि । वान छुस सामानु सुत्य टिपिथ, अकलु ति छस सही कॉम करान तु कामि निशि छस नु फुर्सथ ति कैह । दोद ओसुस लोटस फिरिथ, तथ दिचन थफ तु दराव तापु चंजि मंज़ वापस । वति रूजुस नु खबरुय जि ताफ छु आँदयकि खोतु त्यज्योमुत ।

लल वाख

अथु मबा त्रावुन खर बा,
लूकु हुंज़ क्वंग वॉर खेयिय ।
तति कुस दारी थर बा,
यति नँनिस करतल पेयिय ।।



देद

रिक् कोल

“हय हय गॅयि बिजली...यिथिस गरमस मंज छिनु यिम अडु चॅट्य दोन मिनटन ति बिजली थवान... अदु त्रठ पेयि तन तिमन यिमव अँस्य यथ सफरस लॉग्य। अँस्य हय पनानि गरि हाखा बताह खयवान आँस्य कथ लॉगिक्य यथ सयेकि शाठस, येति बिचयव तु सरफव कुत्य मॉरिथ छन्य... हय। भगवानु ... यि पेयितन त्रठ तिमन यिमव अँस्य यथ शहरस लॉग्य ... कम कम सिन्य आँसुस पननि वारि मंज व्वपदावान तु टासा वॅरिथ खयवान ... अदु त्रठ पेयितन तिमन यिमव अँस्य योर लॉग्य, येति द्रवगु मोलु सबज़ी हयथ तु छुनु तयुथ मंज लगान युथ तति ओसुम लगान ... कति ब्नयम पनुनि वारि हुंद वोसतु हाख, बँदय हाख, मोनजि हाख, सोचल, पालक, मीथय, गोगजि बयतरि तु किथु पाँदय आँसुस बु अलु हचि, वांगन हचि, राँठ वांगन हचि होखनावान... कम कम सीन्य आँस्य... अदु वनान ज़न आँस्य असि दालि बटु मगर तसुंजय दर्य छम कुनि रयतु आँस नु दालि प्यठु वॉरय वातान ... अदु त्रठ पेयि तन तिमन यिमव अँस्य वॅद्विथ छुन्य...” यंबरजल आँस्य वाय वाय करान तु पांसयु सुत्य रॉव्य मुतिस दरामंस याद करान। बोज़ि हयस कुस ... कस आँस फुरसथ यि बोज़नच ... तु बार बार यिमय कथु कस करि बोजुन पसंद ... कुस करि हे हयमथ तु वनि हय यंबरजलि ज़ि यिम कथु पज़न नु दोहरावुन्य ... यथ यि गछुन ओस तथ ति गोव ... बार बार दोहरावनु सुत्य कयह नयरि अमि मंजु ... पांसयु वातय ज़र्यर ... बलड प्रशर छु यिमव कथव सुत्य हुरान ... मगर सु कुस बाँच करि हय सुह गौँछ मयूठ तु वनि हय यि कथ फोनस प्यठ ददि।

खॉर अकि दव्ह आँस यंबरजल यिमनयु कथन दोहरावान तु अमी सातु गॅयि कोचि मंजु आवाज “कॉशुर गबु मा हयव ... कॉशुर कॉलीन मा हयव ... कॉशुर शाल मा हयव ... हय गबु हना ... शालु हना ... कॉलीन हना मा हयव”। यिम कॉशर्य लफज़ बूजिथ वॅछ यंबरजल थोद तु कुनी टुकि द्रायि दर्वाजस निश तु कोरुन अँमिस फेरि वॉलिस आलव। फेरि वोल आव तु खॉर पाठा कॅरिथ चोनुन यजतु सान अंदर। ग्वडु दयुत नस त्रेशि गिलासा तु पतु प्रछनस “चय कयह छुय नाव ?”

“ रमज्ञान”

“ चु कति छुख रोज्ञान ?”

देदी बु छुस गंगयालु किरायस प्यठ रोज्ञान ।”

“ हय ! बलायि आयि तथ गंगयालस, हथा असली कतयुख छुख ?”

“ देदी ... कौञ्ज्य गौडुक ।”

“ हय ... गोव चु छुख मे मालिनुक पोछ ।” देद गॅयि कमन ताम गोतन तु पहर्य खॅड्य प्रुछनस “ चु क्याजि बुथि यिहोय शुस हयु बासान ... बतु छुथा खयोमुत... किनु फाकयु छुख फेरि द्रामुत ।”

“ देदी ... तौंदरि चर्वचि सुत्य चायि प्यालु जोराह चयथ छुस द्रामुत । शुस आसु अतु मव्खु बासान जि अज वॅरुम नु रातस अख जव्ल ति नयंदर ... असि आँस नु राँत्य रातस बिजली । येति त्तयोव गरम तु सौंचान छुस यिम बचेमुत्य शाल गबु कनु हा तु नयर वापस गर ।”

“ हय ! बलाय अयि यिमन बिजली वालघ्न ... यिथिस गर्मस मंज छि अक्सर बिजली निवान तु यि छिनु सौंचान जि प्बलिकस क्याह बनि ... अदु त्रठ पेयि तन तिमन यिमव अँस्य हय हय हय बु क्याह छस यि वनान ...”

“ कुमन गॅछ त्रठ प्यन देदी चु कमन हुंज कथ छख करान ?”

“ हता यिमनयु बिजली वालघ्न हुंज बेयि कमन. व्वथ सव् शाव अथु तु बु शयरय बतु ... होकि छुय नलकु ।”

“ देदी, चु क्याजि करख म्यनि बापथ तकलीफ मे छु व्वन्य आदत गोमुत यक ड गी खयनस बांगि छुस न्यरान चायि प्यालु जोराह चयथ तु चांगि छुस अचान तु बतु मौंड खय्वान ।”

तकलीफ गोयह गज्ब्य चु हा छुख मे माल्नुयुक पोछ ... हता अज लोगुख यपॉर्य फेरि.... ज्ञानि दय बेयि यिखाह जांह कौल्य यपॉर्य फेरि तु हयख मे बुजि माजि खबर ति जानि मयोन दय येति छनु न्यचविस माजि सुंभ खबर हयनस फुर्सथ म्यलान तु चु लोगुख अज अलगौबु यपॉर्य तु युथ मोकु करयमि व्वन्य जांह जि बु शेरु पनुनि वरॉय बेयि कौसि ति बतु थाल कोताह काल वोतुम यिमव अथव फकत पानस कयुथ बतु शेरान यिम दँहन बाँचन शेरान आँस्य । व्वथ लगय बलायि सौरशाव अथु तु माजि पोथरु खेम्ब अज यिक्वटु बतु ।”

रमजान्स लोग नु व्वन्य कांह ति चारु तु बडु शरमंदुगी सान वोथ थोद तु अथु सख्शॉविथ बयूठ बतु खयनि । सु ओस सॉचान जि यि बुड मोज छा पॅज्य पॉट्य कुन्य जॅन्य यिथिस बॅडस मकानस मंज रोज्ञान, यथ मकानस मंज हय कौतयाह बाँच वेप्यन । तु अॅम्य यिमन दॅहन बाँचन बतु शयरनुच कथ वॅन्य ... अमा तिम कति छिस ?" सु ओस यिमनुय दव्लाबन मंज जि तस वोत ब्रॉह कनि बतु थाल ।

“देदी यि छि चॉन्य मेहर बाँन्य जि चये तुलुथ मयानि बापथ तकलीफ.... बु छुस बडु माज़रत खाह”

“ यि हबा छि आसान दयि सॅज मरजी. यिम बतु मयंडऑस्य चॉनिस नसीबस तु वॉती चये बाँह कनि लेहज़ा यि छनु मयॉन्य कांह ति मेहर बाँन्य बॅल्य कि तस दयि संज यॅम्य अॅस्य बनॉव्य ।”

बतु ख्यवान ख्यवान प्रुछस रमज़ानन “ देदी तोह्य छिवा कुन्य जॅन्य येति रोजान ?”

“आहन बा, कुन्य जॅन्य छस रोजान शुर्य छि नफसु हॉरानी हुंदि बापथ बालन तु छालन लॅग्य मुत्य । फकत छि फोनस प्यठ खबर अतर प्रछान तु यार यिनचु छख कमयु पहन फुसथ मेलान ।”

“ देदी यि गॅछ नु लोकटि ऑसु बॅड कथ बुनन्य जि यि छि चॉन्य बद कसमती जि तिम छिन चॉनिस सायस तल रुजिथ तु छि फकत पॉस्स पतु रूजिथ ।”

“ हय्यो! दय रुजनख म्दतस तिहुनज़ सथ रुजिन्य मूजूद सोरुय कॅह छु हम मोयसर थोवमुत अदु बिचॉर्य येलि कॅह कमावन छि तेली छुख पनुन तु पनुनयन शुर्यन हुंद गुज़ारु चलान । येति क्या करु हन येति कति छि नोकरी बनान । खॉर येति ति छि तति रुज़िन सोखु सान तु बजा मयॉन्य छख यिहय ऑही । मे छु तॅमिस सख्गु वास सुंद परंशन चलान तु छस दव्हा दव्हा कडान ।”

“ देदी ति हय छु पोज़ मगर यथ वॉसि मंज गॅछी चये जुर्य तु शुर्य अॅदय पॅख्य नचुन्य. चये कुन्य जॅन्य यथ व्वपर जायि त्रॉविथ छुम पननि कम अकली किन्य वयोठ बासान ।”

खबर क्याज़ि हयोत व्वन्य देदि पनुन बोस रमजानस निश लोचुरावुन, यॅमिस स्व अज़ बाँह जानि हय नु तु नु ओसुन ज़ांह वुछमुत । खॉलिस मालानिक गामुक आसनु किन्य बास्योव तस यि पनुन हमदर्द, य्यमिस बाँह कनि व्वन्य कांह ति कथ खॅटिथ थॅवन नु । अदु रमजानन ति बूज़ु बतु मॉढा ख्यवान ख्यवान तसंज सारये कथ बडु गोरु सान तु मंज़ मंज़

ओसुस दिलालु मदारु ति दिवान । बतु ख्यथ लॅज देद चोकु कामि तु रमजानस वोनुन गॅर खंड आराम करनु बापथ । आराम करान सूच रमजानन “ कांह ति वय्छय छनु खोदायन देदि थॅवमुच गरु छुस ओरुथ तु बोरुत सु कुस चीज़ युस नु अॅमिस मेयसर छु, मगर देदि बिचॉरि ख्यसय वेय्छय छे सव्य छे.... अज़ कल वॅगमिस छि फर्सथ यिथयन हिवियन लूकन हुंज़ु कथु बोज़नस न येति तु नु तति येतुयक बु छुस । बु क्या वनु देदि जि चये हिवयन लूकन छु तति ति यवहय हाल मगर यि वॅनिथ फुटरावुनु बु तसुंद सु सॉच जि कॅशीरि मंज़ ओस नु यि सपदान ।

पॅहर्य खॅड्य हयोत रमजानन देदि रव्वसथ तु तॅम्य वॅगरुस दक्खो दक्खो आँही । बेयि व्वन्नस गरि कयन तु बाकी मालिन्य गामु कयन वॅन्य जि तसुंज़ सलामा । स्व रुज़ दरवाज़ु हंगस प्यठु तोताम खडा योताम नु सु नज़रि डोलुस । पतु चायि अंदर तु बिजली बेयि नु वुछिथ व्वनुन “ हय ! बलाय आयि यिमन बिजली वालयन यिथिस गरमु गट कारस मंज़ ति छिनु बिजली थवान सॉचानयु छिनु अमा लूख मा मरन अदु मॅर्यतन तिम यिमव अॅस्य यथ गट कारस लॉग्य”

ललु वाख

आॅरस नेरि नु मोदुर शीरय,

न्यवीरस नेरि न शूरा नाव ।

मूर्खस परुन छुय हॅस्तिस कशुन,

यस मालि दांदस ब्यहा चाव ।।

ललु वाख

मूढस ज्ञानुच कथ नो वॅनिजि,

खरस गोर दिनु राविय दोह ।

युस युथ करिय सु त्युथ स्वरे,

क्रेरे वॅरिजि न पनुन पान ।।



ठोर

ओंकार कौल

यि ओस अख खास लेकचर । मोजू ओस कोमनिकेशनस मंज़ ठॅर्य । लेकचर दिनु वॉल्य ऑस्य मशहूर ऑलिम, वारयाहन कुसमन हॅदय ठॅर्य आयि वेछनावनु । तिमन प्यठ कोबू प्रावनुचि तरकीबु बयान करनु । लेकचर गव खतुम । सारिवुय कोर ज़ोर जोरु च़रि पोप । रसमी शुकरिया आव करनु । तस ओस पूर तसलेह ज़ि लेकचर आव सारिनुय पसंद । यि अमि किन्य ज़ि येलि सु बोलान ओस च़वपॉर्य ऑस हॉरानकुन छवपु । सारिनुय हँज़ु नज़रु आसु दरु हिशु लजिमच़ । लेकचर पतु गॅयि सवाल जवाब शोरु । यिम ति सवाल प्रछनु आयि तिमन द्युत तॅम्य सूचिथ संमजिथ छवटयन लफज़न मंज़ जवाब ।

सॉरी द्रायि हालु मंज़ु नेबर । कैह आयि तस ब्रॉह कुन तॉरीफ करनि । स्व अख आयि असान असान येमि अख जान सवाल प्रछमुत ओस । लेकचरुव्य तॉरीफ करान वोन तमि ।
“बु छस यछान त्वहि सुत्य फोटू तुलुन ।”

“क्याज़ि नु !” यि बूज़िथ वोन तमि फोटोग्राफरस फोटू तुलुन बापथ ।

“तोहय छिव मे वारयाह ज़िदय ? तोहय हयेकिव मे प्यठ नॅर थॅविथ” । तमि द्युत असान असान मश्वर ।

पनुनिस सफेद मसुकलस कुन इशारु करान द्राव तसंजि ज़ेवि ।

“पोज़ वोनवु ?” मे ज़न छे नु वुनि पनुन्य वुमुर कांह ठोर बासान । खूबसूरती छे मे वुनि ति पानस कुन वॅगशिष करान ।

यि बूज़िथ वुछ तमि शर्मि सुत्य ब्वन कुन । ज़न ऑसुख स्व च़ूरि रॅटमुच़ । फोटोग्राफरन तुल फोटू ।



मनी पलांट

रूप कृष्ण भट

म्यानि गरुचि डबि प्यठ ऑस हीरा लाल निस मकानस कुन सेदि स्योद नज़र। ल्वकुट म्वकुट बंगलि चालि मकानु। ब्रोंटुकनि सर सबुज़ लान। लानस अँदय अँदय पोशि डूर्य। दरवज़स नखु वरंडाहस प्यठ गंवलस मंज़ लगावनु आमुत मनी पलांट। येम्युक जहार ब्रूदय लबि अंदु वंदु फँहल्योमुत ओस।

येलि ति बु डबि प्यठ नेरहा म्यॉन्य नज़र ऑस सारी ब्रोंह अथ मनी पलांटस प्यठय येवान, येम्युक सर सबुज़ पन अँछन तरावथ बख़शान ओस। मे ओस मथ गछान जि बु अनु अमिच अख लँड चँटिथ तु लागु पनुनिस बेड रुमस मंज़। हीरा लाल ओस सुबहन गँडिथ पॉदय पूजा कँरिथ नेरमल अँथ्य गंवलस मंज़ त्रावान तु तसुंज़ आशेन्य शांता जी ऑस प्रथ द्दह शामन पयपि सुत्य अथ सग दिवान। मनी पलांटकिस पनस ऑस कशि पोन्थ छकान युथ अथ प्यठ हेनु आमुच गरुद छलनु यियिहे। लेहाज़ा ओस पन सर सबुज़ तु नपु नपु करान।

येलि ति बु शामन बॉग्य दफतर प्यठ यिमु हा, हीरा लालुन्य बॉच जु ऑस्य अकसर लानस मंज़ सफेद कुरसियन प्यठ बिहिथ आसान। युथुय बु डबि प्यठ नीरिथ तिमन नमस्कार करुहा, तिम ऑस्य असान असान मे नमस्कारस जवाब दिथ बडि बडि ऑही करान तु इशारव सुत्य पानस निश बुलावान। बु ओसुस यि वँनिथ जि वुन्य कयन नु बु यिमु ज़रूर बेयि कुनि सातु, तिमन निश गछुन टालान। वजह ओस नु बेयि कांह बँल्यकि फकत म्योन आलुछ तु म्यॉन्य मनहूसयत। मे ऑस्य लग बग शे रेथ गॉमुत्य दिलि प्यठ जोम तबदील गॉमतिस, मगर यिमन शेन रेतन मंज़ ओसुस सिर्फ अकि फिरि तिहुंद गरु गोमुत। मगर डबि किन्य ओसुस लग बग द्दहय यिहुंद दर्शुन करान। हरगाह कुनि द्दह वुछुहाख नु मे ऑस तिहुंज़ कल रोज़ान।

दरअसुल ओसुस बु दिलि हुंदय लयफ सिटायलन मिशीन ह्युव बनोवमुत तु इनसानन हुंज़ स्वहबथ तु वुकथ ऑसुम मँशथुय गॉमुच। बस सिर्फ पनुन पान तु बेयि नु

कैह । हालांकि जेमि ऑस वखतस वारयाह बागनय तु ओरु योरयुन गछुन ओस स्यठा सहल तु अँकिस गटस मंज्र यियिहे इनसान अकि अंदु प्यटु बेयिस अंदस जेमिस छठ कँडिथ । मगर खबर मे क्वसु शिकस ऑस आमृच बु ओसुस पॉट्य कयेम्य सुंद्य पॉट्य पनुनिसुय आडंबरस वलनु आमुत ।

हीरा लालस ओस कुनुय नेचुव, सु ओसुस पँत्य म्यव दँहव वँर्ययव प्यटु अमरीकाहस मंज्र रोज़ान । ग्वडनिक्वन वँर्यन ओस प्रथ वँरियि गरु यिवान, मगर खांदरु पतु येलि तस पनुन परिवार बडयोव तसुंद देस युन गव कम । व्वन्य ऑस्य हीरा लालन्य बॉच ज़ु वँर्यस मंज्र शेन रेतन अमरीका गछान तु शेन रेतन ऑस्य जेमि रोज़ान । अलबतु पँत्यम्य द्वयव त्रेयव वँर्यव प्यटु ओस ओरु योर यिनुक गछनुक सिललिसु कम गोमुत । मे ओस दिल करान बु गछु तिमन निश तु करु खुलु पॉट्य कथा बाथा मगर खबर क्याज़ि ऑसुम नु अथ वथय यिवान ।

कैचि कॉल्य प्यव मे दून रेतन हुंजि ट्रेनिंग बापथ दिलि गछुन । बु येलि वापस जोम आस हसबि मोमूल द्रास पनुनि डबि प्यटु तु त्रॉवुम हीरा लालनिस मकानस कुन नज़र । मे गँयि अँछ रूज़िथ । मकानुक नखशय ओस बदल्योमुत । मनी पलांट ओस नु कुनी बूदय । वरंडाहचि यथ लबि प्यटु तम्युक जहार ओस तथ आसु लेदरि रंगु नपु नपु करवनि टयलु लॉगिथ । यथ लानस मंज्र हीरा लालन्य बॉच ज़ु अकसर कुरसियन प्यटु बिहिथ ऑस्य आसान तथ ओस ज़्वज़ुर फ्यूरमुत । मे गँयि अकलि बकल जि यथ क्या गव यि ।

कुनी टुकि वोथुस व्वन तु दवान दवान गोस तिहुंदिस गेटस निश । तथ वुछुम बोड कुलुफु कँरिथ । बु गोस हयबुंगु ह्युव रूज़िथ जि गवय तु गव क्या । बु ओसुस यिमन्य ग्वतन जि ओरु आव सोन ब्याख हमसाय प्रथवी नाथ । दोपुन क्या छुख गेटस वुछान, हीरा लालनि अचानक गुजरनि पतु आव तसुंद नेचुव अमरीकाह प्यटु । मॉलिस चूरमि दुहुक क्रया करम कँरिथ, लागनाव्यन सॉर्यसुय मकानस अँदर नेबरु टयलु । दोपुन स्व कस छे फुरसथ युस अथ वाति ।

मनी पलांटच ज़रदेमृच लँडा अख अथस क्यथ तुलिथ वोथ प्रथवी नाथ, “पता छया पनुनि जिंगगी हुंदय 35 (पाचत्रह) वँरी सरकारस अरपन कँरिथ येलि हीरा लाल रिटायर गव यि मनी पलांट ओसुस पनुन्यन सॉथ्यव पारटिंग गिफट द्युतमुत । अम्युक ओसुस बडु मारु मोत, सख रॉछ ओसुस करान । दपान ओस यि छु म्यानि खॉतरु यादगॉरी तोहफु । तम्युक काठ न्युव राथुय बाकृय मलबस सुत्य म्यूनसपलटी वाल्यव तुलिथ । हाय

इनसानस नु कांह कथा पानस ताम । मॅनी पलांटचि लंजि दूर नालि कुन कश कडान तु
ज्युठ व्वशा त्रावान वोन प्रथवी नाथन तु द्राव ।

बु गोस रोबूद ह्युव । किहींय फूरुम नु । साँरी सवाल श्रपेयम मनस मंजुय । आरकचव
चेश्मव त्रॉवुम हीरा लालनिस मकानस कुन हेरु च्छुठु ब्वन ताम नज़र तु थीय साँचान जि
कंह कथा नु इनसानस पानस ताम, द्रास फुटमित्यव क्वट्यव गरु कुन ।

ललु वाख

लतन हुंद माज़ लारयोम वतन,
अँकिय हाँवनम अकिचिय वथ ।
यिम-यिम बोज़न तिम कोनु मतन,
ललि बूज शतन कुनिय कथ ॥

ललु वाख

स्वयि कुल नो द्वदु स्रुत्य सँगिजि,
सर्पिनि ठूलन दिज़ि नो फाह ।
स्येकि शाठस फल नो वँविज़ि
रावँरिज़ि नु कोम-याजन तील ॥



यिम छि नु तिम

देबा नज़ीर

बु आँसुस अज़ रॉत्य रातस हुशयार । लरि फिरुन्य दिवान । सुबह फवलनस प्रारान तिक्याज़ि अज़ आँस आथवार । मे ओस मातामाल गछुन । अपारि प्यठु लॉय ममी क्रख जल जल लाग पलव पतु गछि च़ेर । मे आव नु ज़चन नाल अथि । मे लॉग्य नॅव्य पलव । आँगुन्य दरवाज़ु येलि द्रॉय नेबुर्य सम्खयोव अख हमसाय । कोत साँ सुबहॉय सुबहॉय, मे वोनस बडि हटि मातामाल । यि मातामाल छु मोदुर तु म्यूठ पॅज्य पॉट्य आसान । अँम्य वोन खोशी सान ।

मे आँस ममी अकसर पनुनि माजि हुंज़ कथु वनान । दपान आँस म्यॉन्य मोज हरगाह बोज़िहे मे छे कोरि कूर ज़ामुच़ । पतु क्या खानु माजर करिहे स्व । तिक्याज़ि स्व आँस नाहकुव्य शुर्य रछान । सानि गरि ओस मुसॉफिर ति ख्यथ च़ेथ नेरान । व्वन्य आँस नु पनुन्यन हुंज़ कथुय । स्व आँस हमसायन हुंज़ राजु मासु । वति लॅज मे ममी वनुनि यिनु तति खॅरिल करख । मे वोनस नु बु बेहमु त्वति पॉट्य । तति आँस्य मामु सुंद्य शुर्य मे ओस तिमन सुत्य ख्वश गछान गिंदुन ।

तु खॉर वॉत्य । बरस ओस तोर बुथि । मे कोर ज़ोरु टुक टुक । ओहो ओहो । कुस साँ छुव ? अति द्रयि म्यॉन्य मामुन्य । वारय छिव । किथु पॉट्य आयिवु ? यूर्य प्यठ छिवु आमत्य ? अँस्य द्रायि । असि छु चकरस गछुन । यिनु बॉह वॅर्यज़िहे फोन ? ममी वोनस अदु बाक्य छिना ? असि छु सारिनय गछुन । ग्वडु गछि नु आथवारि दोह कुन गछुन । आथवार छे सारिनय छुटी दोह आसान । अँम्य न्युव अँक्सुय शहस मंज़ सोरुय वॅनिथ । यि छे नु असि अंदर अच़नु बापथ ति वनान । अँस्य च़ायि पानय बीट्य ब्रांदस प्यठ । कोड थख । ओरु द्रायि यि कुलुफ हेथ । म्यानि माजि वॅर मे अथस थफ । सडकि प्यठ समखेयि तस हमसायि बाय । दोपनस वुन्यय आयख तु द्रायख क्याज़ि ? मयानि माजि वोनस । पनुन मोल मोज आसान सलाम उस्तुय गुलाम । अमि सातु तोर नु मे अँम्यसुंद वनुन फिकरि । तिक्याज़ि मे ओस नु अम्युक तजरुब ।

वति छि पकान म्यॉनिस अथस प्यठ प्यव आबु टयोक । मे दिच हयोर कुन नज़र
अति ऑस म्यॉन्य मोज वदान । मे दोपुस चु क्याज़ि वदान ? दोपुन मे ओस मॅशिथ गोमुत
यिम छि नु तिम यिम मे पनुन्य ऑस्य ।

ललु वाख

लॅराह लॅज़म मंज़ मॉदानस,
अँद्य अँद्य कॅरिमस तँकियु तु गाह ।
स्व रोज़ि यँत्य तय ब्व गछु पानस,
वोन्य गछि वानस फालव दिथ ।।

ललु वाख

ब्वथ, रॉन्य अर्चुन सखर,
अथि अलपल वखुर ह्यथ ।
योदवय ज्ञानख परम पद,
अक्षर हि शीखर खेय शीखर ह्यथ ।।



बु त चु (नज़्म)

मजरुह रशीद

समयि टेच अख रोटु गॉमुच
शिन्लिय सहरॉव्य फिज़हस मंज़
हेरिथ पेमुच छे यथ मंज़
वावु रंग ताम
चे कया
चु छख पानस दिवन अँदय अँदय
द्वहय गथ
समय बासान छुय अख सायि बाना
मँछयुल शेहजार हनि हनि छुय चे प्रेडान
चेवान छिय रव्व स्वनुहँर्य चॉन्य रुमरुम
मे कुन वुछ, वारु वुछ, नज़रन तॉर्य मुचराव
अतय बासीय बु किथु छुस थानि गोमुत
अतय चेनख बु किथु छुस लीन गोमुत
यिथिस वॉरॉन्य फिज़हस मंज़
अतय बासी बु मा छुस अज़ ति
प्रॉन्य पॉठय
स्वन छारान तु ग्वन रावान

प्रज़नथ

रतन लाल जवहर

मे मँशरोव यामथ
बु कुस छुस
कत्युक छुस

क्या नाव छुम
क्राम क्वसु छम मे असली
तामथ बुडव नियि शोवूरन
तरफाथ छँडिथ आव

स्व फरदुय मे मनसॉव
यथ पेठ दरज ओस
गुथुर म्योन, अजुल ता अबुद म्योन
राजरव नसुब आलमुक नॉल्य त्रोवुम
नोवुय ज़नुम प्रोवुम
मगर एतिकादन ब्रोकुस बेयि
दिलस बार त्रॉविथ तु जज़बॉत्य बर्नॉविथ
जंगल लोरि चँड
विह्य कदमुच सपुदय रॉस्य

गजुल प्रेम नाथ शाद

ख्यालन मंज दूहय म्यान्यन वज़ान छख
लछन सासन अंदर छम चॉरमुच अख
कसम हॉविथ वनय चुय छख स्व चुय छख
नेरल नाज़ल तु नोजुख नूर पैयकर
नज़र रूज़िथ गॅयम यामथ चु वुछमख
चै छुय स्वगाथ हुसनुक बागि आमुत
रुहस राहथ बशाशथ छख बिला शख
यि वथ दुशवार सफर प्राटन स्यठा सख
अमी आशायि प्रारान रोज़ु वातख
पॅज़िस लिलस ख्दॉरी ख्वश दपान तीय
सकूनुक फवलि सहर योद वादु पालख
थवुख फलि फलि चु वहरॉविथ वतन शाद
हुरी रवल तेलि पनस येलि म्वखतु तारख

मज़ाँहोय टुख

प्रेम नाथ शाद

अथु दॉरिथ असि रूदा मोंग
असमान खोत ओबरुक लोंग
ग्वडु गॅयि वुज़मल पतु गगराय
अफताबन हेच लेफ तु श्वंग

○

नाँविद काका मे ति कास मस
मे गछुन शामन छुम सालस
बु अनय नाटि फोल चानि बापथ
व्वलु सा ग्वडु चुय कुर्सी खस

○

काका जियन कोर टी वी आन
अति आयि काजोल शहरुख खान
बुड्य बबस नज़र पेयि तॅम्य वचि अँछ
नानि दिच्च बडि क्रख त्राहि भगवान

गज़ल

राजंदर आगोश

मेन्य कथ मॅशरॉवन व्वन्य
हनि बलनुय मंज़ साँवन व्वन्य
अथ कथि मा वोथ ज़ांह पुर ग्वाश
होन्यन अथि यि खँवुन व्वन्य
मंज़ आमस बस नेथु नॅन्य रूज़
ज़चि पचि चॅटय थुय त्रॉवन व्वन्य
रेह वॅछ यादन मंज़ वछसुय
नारुक ताव हुमुनाँवन व्वन्य
छवकनुयु त्रोवनस फेकि फेकि नून
गनि कर्यथुय कत्रॉवन व्वन्य

मॅसती मिलुवन्य ज़हरि हिलाल
प्यालन बॅर्य बॅर्य चॉवुन व्वन्य
कथि हुंद अंद मा लोबुथ आगोश
पचि फयुर वॅरथुय बॉथुय बॉवुन व्वन्य

गज़ल

आगाज़ असुल ओस वेहय अंजाम गलत गव
यि कुन ओस संगलात मगर बाम गलत गव
मेच्चि बानु दयुतुन प्वखतु करुन तोग नु पयुन मे
कमि बुथि बु हावस पान च़कि शुद खाम गलत गव
कति जॉन्य फरख गॉफिलव आबस तु शराबस
छि प्यालु मोतुनदामु च़ेवान जाम गलत गव
इनसॉन्यत तहखानु तु शहमार वॅरिथ रॉछ
शेतान सजद हेथ नच़ान सरि आम गलत गव
दय आसि पछतावान बनॉवुम क्याज़ि आदुम्य ज़ात
बुत रॉच़ प्यठ प्रथ तरफु छु कवहराम गलत गव
गोहर अँदीबव दूहय वोन प्रज़नथ छि बचावुन्य
बूज़िथ ति वॅरथ ओन अमलि मंज़ पॉगाम गलत गव

जु गज़ल सुनीता रैना पंडित

१

ग्रकु आगरनि रफतार गोछ
येमि आवलुनि मंज़ु तार गोछ
अख शाम फुरसच़ हुंद गोछ
बेयि च़ानि ज़ेवि यकरार गोछ
हरफन नज़ाकथ चॉन्य हिश
सॉथस ख्वहय अनुहार गोछ

छस खून हारान अँछ वँटिथ
 म्युल नय त अख दीदार गोछ
 मे छु रास युथ आमृत कुन्यर
 येमि शोरु शवु ग्वकजार गोछ
 येमि नारु यिनु पेयि त्वछ वँसिथ
 अमि नारु मंजु गुल गुलजार गोछ

२

पैजि न गरु, नय कांह ठिकाना समखुहव
 समखनुक ति नु कांह बहाना समखुहव
 बोनि शोहजारुक न गुफतारुक मिजाज
 नोट नु हटि क्या खसि तराना समखुहव
 वाव डोल, असुन तसुंद च्युनुम येती
 शेछ थँवन कुनि जायिजाना समखुहव
 समखनस छा वार वावस रवख छु कूठ
 ज़ेव छे कथि कथि बनि बयाना समखुहव
 पोत नज़र दिथ वुनि जुवान च्युह च्यह अँच्युक
 नार चापान गव ज़माना समखुहव
 दूरि बथ, वतु गथ ति हेनु आमृत्य खुर्यव
 छवपु वँरिथ द्यब यिम छि दाना समखुहव

गज़ल

अशोक गवहर

मेहरबानु चोनुय करम यूथ नु राव्यम
 तुलिथ चानि नावुच अलम युथ नु रायम
 स्यठा जितनु वँर्य वँर्य औनुम लयि सु सातय
 चु प्यालन बँरिथ जाम जम युथ नु राव्यम
 अँधव नय वयछुम ज़ाँह मगर खाबु डयूंतुम
 दिलस मंजु बँसिथ छुम सनम युथ नु रायम

गुलम मंज बखशान गरन गाशिरावान
 वुठव प्यठ सु इसमे अजम युथ नु राव्यम
 शहन हुंज यि सख वस दिलुक दुब छु तँम्यसुनद
 बँसिथ मंज वोजूदस सु दम युथ नु राव्यम
 वुछिथ हुसनि आलम मुदस यिनु मश्यम ज़ाँह
 छु अपजुयिय चम खम कदम युथ नु राव्यम
 फुटान दिल अबादथ करान मोम संगदिल
 मेहर चॉन्य बरनस हलम यिथ नु राव्यम
 अछर गवहरन पर करूस सर बुलंदी
 रँहम कर मे काकुद कलम युथ नु राव्यम

गज़ल

मोती लाल मसरूफ

न छि रंग हव्खुच न बहारस युन ।
 न छु मागचि कवछि मंज हारस युन ॥
 छुनु वुनि यि तखयुल त्युथ प्रजुल ।
 छुनु ज़य्य पयठ अतु मव्खु शारस युन ॥
 बस चशमन मंज अख याद फवजम ।
 छु यि शायद मा लव्कचारस युन ॥
 सिँगन्यारय नोन छुनु यारु बलन ।
 पय पत्तु छुनु छा कवल तारस युन ॥
 न्यनेद्राव छु दामन पँहलॉविथ ।
 सँमि शकलि वँन्य पययि व्यव्हारस युन ॥
 मसरूफु लगय्य यिनु ग्राय ऑनस ।
 वख शायद होय्तुन करारस युन ॥

गज़ल

अशोक कुमार धर 'गोहर'

हेकहा तु चीरिथ हावहय शुम्शान वछस मंज़ ।
लेश्य जन छेय दज़ान आरु कुश्य अरमान वछस मंज़ ॥
सासव दिलासव शौंगि नु चान्यव यादु वोटुर मयोन ।
मे छु वुनि ति रवां रातकुय तूफान वछस मंज़ ॥
य्यमि तहुर सलामथ छे बस ज़यि मयेहर आदुम्य ज़ात ।
अरसातु मंज़ नतु कौंसि छा इनसान वछस मंज़ ॥
तेज़ाब बन्योमुत छु लुकन आब अँछन हुंद ।
येति कौंसि बापथ कौंसि छुनि येहसान वछस मंज़ ॥
छु छयनु छदौयी हुंद खता जहानस तु ज़मानस ।
इनसानुनयु रोछ नफरतुक शयतान वछस मंज़ ॥
ज़रु ज़ोरु अमल हयये नु कांह मँल्य सपदि खरस नर ।
गाटुल छु सुय येम्य रँछय पनन्यु पहचान वछस मंज़ ॥
प्रथ सातु कयामथ छे मंगान चोन अमानथ ।
चौनी तु चयेय कित्य गोहरन रँछय प्रान वछस मंज़ ॥

आलव

रतन लाल जोहर

म्योन आलव फयूर तर्फातन
तु वोट वापस बेयि मे निश तसला गँछिथ
न द्राव शी कँरिथ त्रनि पांचालस
न फ़टु लद गो व्यतसतायि बँदय दिवान डाल
न सर्यन कुन
न गामन कुन
न मंदरन आसतांनन कुन
नियन छाल आसमानस कुन

पकान रूद ओबरु डयंगयन सुत्य
सपुद वुज मल तु गरायन अंदर ज़म

म्योन आलव फयूर तर्फातन
तु वोत बेयि वापस मे निश
शाहु छोकिथ
फयमु लद पशयमान
क्याजि द्रायाव आसु म्याने होशु रोसुतय जोशि लद
यस यि बोज़ुन ओस
सु आमुत हयनु तु खाबन मंज़ गोमुत गीर
क्रालु मँत्य खव्व ज़वॉयी यछ खयॉली

अगर चु यीहख

शाद रमज़ान

अगर चु यीहख
वछवा छव वथ वुछान बु रोज़य
गुलालु दिल हयथ बेयि स्वख अमारुक
रहयल तम्ना तु बौठ सोज़य
कदम कदम मोख गुलाब फवलयम
नज़र नज़र सोख शब शोलयम
सेक़ुल मकदर ति नाग वुज़िहयम
क्रहुन सयाह वख ति गाश फोलयम
अचख तु ब्रांदस दँछन्य तु खोवर्य
सरव सनोबर
नेमेन तु पादन चय बोसु दय हन
खसख तु पायन अनॉर्य यावुन
चय मांज़ लागन अथन तु खोरन
दीवान खानस अंदर प्रसता
ग्रज़न तु साज़न सरव दोद लसन

वनख तु साज़न तु वगसन
 गयवान तु मयोनय सु बॉथ गयवान
 अगर चू यीहख
 दपख तु वालख बु ज़ोन तारख
 वसन तु व्वल्सन तु शोलि आंगन
 गंडन तु टोगजन अंदर गंडन दैर्य
 विसन तु हकचन अंदर करन रव
 शयक शयता तु सोन आंगन
 नेक नेसता तु सोन आंगन
 चू वार प्यठ छख नज़ारु छावान
 बु आंगनस मंज़ नज़र रलावान
 समय छु व्वलसा
 छे होरु रकसा
 ज़मा मकानुक शमा छु प्रज़ला
 प्रछन तु प्रछ्य तन
 लुकन छु प्रछ्यं
 यि कुस छु आमुत
 बंजर ज़मीनस बहार ज़ामुत
 यंबरज़लन ताम छु गाश आमुत
 कोबन कुलयन ति छु वाश द्रामुत
 छु वक ति नाज़ा, गचर फोलुम गाह
 छु बख ति व्वलसा, डयकस च़ैजिम द्रह
 प्रछन तु यिकवटु प्रछन मे सॉरी
 यि कस छु बख अज़ बेदार गोमुत
 मे अंदरु अंदरी
 रबाब वज़ोल
 गोलाब नज़र्न फोलन तु शोकस ग्रज़न समंदर
 शबाब शोलेम
 तु हुसनु बागस फोलेम त्वसम
 चय शोख दिल योद प्रछी तु वन्यज़ेस

अमार छुम बेशुमार चोनय
अगर चु यी हख
बु नालु रटहथ
तु याद पावय
सु बालु पांन गुलालु मोसम
शुहल तु शबंम
छु बाग बागस अंदर कुलिस तल
चये चोंठ वोलथ मे आँस दोरय
मे चोव शबता अँछव
तु दिल श्रोप शराब खसयन
चु चाख मेनिस रोहस अंदर रोह
शहन शहन मंज़ु चये शह गो बोवय
कहस कहस मंज़ु हिसाब रोवय
रमस रमस शह अमार व्वलयव
अंगस अंगस रयह खमार व्वशलोव
चये प्रज़नोवथ जनो शोकस
मे प्रज़नोवुम स्कून लोलस
हुसन छु नाज़ा तु पा मोलवा
अशक छु रकसा तु पा अबसा
मे गो कंन अख सदा उतर गोव
मे दोप ख्दाया... सुबह छु फोलमुत
वनय तु वनु कस छु वख ति डोलमुत
चये बाग तांवन सपदय परेशान
गुलालु सीनस बु दाग ल्लवान
बु तँथ्य कुलिस तल छसय प्रारान
अगर चु यी हख

नज़म

ब्रज नाथ बेलाब

तिय छु चोन मरुन
रावान
चु आख तेलि ति मारनि
चु यिख अज़ ति मारनि
चु यिख दोहय मारनि
व्वन्य गो राम येयि नु
प्रथ विजि
योद करनि चये सुत्य
यथ यवगस मंज़ छु
राम सुंद युन मुशिकल
यि युग छुना
रावन चोनुय
हालाकि
सीता हरन स्पदिथ ति क्याज़ि छुनु
रामस गॉरथ यिवान
ब छुस सौंच्य सौंच्य रावान
ब छुस यि सौंच्य सौंच्य ति रावान
जि अज़ मा छु चानि बदलि सीतायि मरुन
अज़ मा छु सीतायि बदलु राम हरन सपदुन
अगर राम हरन सपुद
लखनस मा छु खराद बनुन
भर्तस मा नीयतस चूर चामुत
तेलि मा ओस राम तु रावुन
अज़ छि भरत तु लखमन रोबूद
अज़ मा छु तहुंदय मरुन तय
तिम मरन
तु चु बचखाह रावन
सवाल छु ति

गज़ल

जगर नाथ सागर

हयेतुम पाम गम खँटथि थावुन मे गो दामानु सर्य पानस
दोपन "पोशान छु कस यावुन" मे गो दामानु सर्य पानस
मे वुछ गुफतार वँटस्य गोमुत यिमन सनान कोचन मंज़
खबर कस क्या छु वेतरावुन मे गो दामानु सर्य पानस
लेखिथ ओसुख कंनयन थोवमुत यपॉर्य यिनु सॉ पकवि कांह
तवय पयोम युन अपॉर्य त्रावुन मे गो दामानु सर्य पानस
अज़व कर चुय खदाया बार गोब छुम फेक्य मे छिम कमज़ोर
छुसय मा बयु ज़हर खयावुन मे गो दामानु सर्य पानस
सँदुर व्वलेव नियन दव दिथ खबर कोत सॉचि स्वोथ्य सॉरी
अँमिस ओस जोर अज़मावुन मे गो दामानु सर्य पानस
शहर असु वुन्य, रंबु वुन्य दोह, मँछल्य तिम शाम, तारख नब
युथुय यी याद हयोतुम पावुन मे गो दामानु सर्य पानस
अतुर पानय कोरुम सगर्नय बँल्य तकदीर अज़मोवुम
अँछव किन प्योम छटुन शरावुन मय गव दामानु सर्य पानस

गज़ल

वली असीर कशतवाडी

ज़मानुक र्वख तु बेयि रफ़तार बदल्योव
ब्रंज़न मंज़ दोसतन किरदार बदल्योव
थोकन अथु यिम दारान ऑस्य योताम
तिमन हुंद लहजु तय गुफतार बदल्योव
फिरिथ बुथ वथ चटुन्य हँयच ज़ॉकारो
मे गोव अहसास व्वन्य पनुन्यार बदल्योव
छि लाशव सूत्य बँर्य बँर्य वुनु ति जंगल
चये वँम्य दोपने जि मोतुक कार बदल्योव

हु हरदुन वाव वॉरॉनी वॉरिथ गो
 हरिथ पेयि गुल तु बेयि गुलज़ार बदल्योव
 अकुय गोव लरजु आसमानंस ज़मीनस
 अकुय पयाम तु कुल आकार बदल्योव
 खबर बूज़िथ नयबर द्रायि लुख वुछने
 यि किथ्य वॉन्य इकतारुक यार बदल्योव
 तमिस ऑसय करुन्य आजमॉयश
 मे बास्योव यारु सुंद इशारु बदल्योव
 लुकव निशि शॉयरी दूर त्रॉवख
 शकल बदलेयु तु सोरुय शार बदल्योव
 यि छुय कर्तब सौंचुक नतु यि छा पोज़
 यि वकतुक रंग तय अंहार बदल्योव
 सु सुबहुक वाव वुज़नॉविथ वनान गो
 असीरव ताफ़ पोव शहजार बदल्योव

जु मज़हॉयु नज़मु

ओमकार नाथ शन्नम

१

कुनि किन्य नु दुह बॅल्य नार
 कति जोम तु कति गुप्कार
 गरु ओस बोड बब जा
 लारुक्य हसाँ लॅग्य दार
 वुछ तन यि कक्कर मोर
 तलु पत्य छि छटान नार
 थोवुख हु कुनुय ज़न्
 गोनि रव्व सल्लु दस्तार
 कति नव्श तु कति शन्नगि कूर
 शन्नम ति प्रहेयज़ गार

अमि खोतु कुस गटु कार
 अमि खोतु कुस गटु कार
 यॅति व्वन्य छु रिफूजी
 यिति गव अजब गटु कार
 अॅथ्य मंज़ु मॅय रल्लु ज़ल्लु कोर
 अमि खोतु क्या गटु कार
 नवशि तय नय्चवि कोड बयोन
 अमि खोतु कुस गटु कार
 आशयन्य ति रयुनसि दूर
 अमि खोतु कुस गटु कार

२

जंग

मालिन्य प्रछनय दपन बतस
 दाह त्रह पंचाह गरकी यिमव
 हयतसि दिलस असि छुनु रोशनी
 हव्हवुरुय त्रावन चंदस लछाह
 सौ कति बनान हयन्जय वाजयन्य
 डिसको डानुस वानुस करव
 वयशनव बतस प्यठु मा पजय
 नान वयज्य सन्य हन दह वुह रनव
 डिमांड विमांड ति मह करव
 चक्यु हरगह दिचुन रटव
 तुंबख नारयन प्यठ मा खसय
 असु वुन शबन्म्य शारुय वनव

देंप्जयख असि कोर रिफारम
 तथ क्या करव सौ गयि जंग
 कनि वाजि वॅटसि पोशयम ना
 तथ क्या करव सौ गयि जंग
 सु कति अनव कयनज्य खोस
 तथ क्या करव सौ गयि जंग
 जिजाजी यस करुन साल
 तथ क्या करव सौ गयि जंग
 कोरय मॉलिस पनुन हुब
 तथ क्या करव सौ गयि जंग
 फलिमी गान्न हुंदुय सोज़
 तथ क्या करव सौ गयि जंग

गज़ल

ओमकार नाथ शबनम

लसुनुच व्वन्य मह रोजिम बाथ
 वसलुक रोवुम अख अख साथ
 चॉन्यी द्वय यनु वतु गयि बंद
 रयतु वादन छयनु सव्वान राख
 वुदय वुदय लयखुन यम्य सयु तोग
 नासमजव वोन तँत्य गोनामाथ
 बु ति दिमु हा नतु सीनस चाख
 राव्यम मह पनुनुयु अवकाथ
 पोज़ पॅज़रॉविथ ज़हुरक जाम
 वछि वॉलनजि गव चयथ सैकराथ
 बचि कुस लसि कुस ब्रॉटुस ताम

मेय छम लॅजमुच्च अँज्य वॅहराथ
बॉथाह लयखुहा मानय दार
वरदार शारव प्यट्य पेयि राथ
मन्नरस प्यठ यलि शबनम आव
तस द्राव पतु पतु लुकि अरसाथ

ललु वाख

सुहनि हुन्द शिकार पॉज कव ज़ाने,
हाँठ कव ज़ाने पोतरु दोद ।
शमहुच क़दुर लॅश कति ज़ाने,
मॅछ कति ज़ाने पॉपर्य गथ ॥

ललु वाख

दोद क्या ज़ानि यस नो बने,
गमुक्य जामु हा वॅलिथ तने ।
गरु-गरु फीरुस पेयम कने,
ड्युंदुम नु कांह ति पननि कने ॥



हंगुल तु तँम्यसंज्र छाय

तर्जमः शम्भु नाथ भट्ट 'हलीम'

अख ओस वांदर पादशाह । सु ओस बिज्रॉती बद ज्ञात । सु ओस वांदरन हुंज्रि अँकिस जमॉच पेट हकूमत करान । तँम्य चॉप्य सतु ज्ञाव बचु युथ नु तिम तसुंद तख्त्तय वुल्टावन । यि वुछिथ चँज तसुंज्र अख बँरुच रॉनी । पनुन नोव ज़ेनु वोल बचि बचावनु खॉतरु ।

कँह काल गुज्रयोव । अकि दोह योछ रानी हुंदय नेचिव्य पनुनिस मॉलिस समखुन । मॉज वँछुस खोचान-खोचान, "पोतरु, सु छुनिय मॉरिथ" । नेचिव्य वोनुस, "मॉज, खोचमु" । बहरहाल मोनुस माजि ।

वांदर पादशाह ओस नु तिमन खोश । मगर खोश आसनुक हीथ कँरिथ रोट तँम्य पनुन नेचुव नालु मति । वारु-वारु ह्योतुन तस त्युथ चीर द्युन युथ तस जुव नेरि । मगर जवान वांदरन ति कोरुस संगीनु पॉदय नालु मोत ।

अमि पतु आव वांदर बादशाहस अख कोफल देमागस मंज्र तु वोनुन नेचिविस, "पोति, मे छु तय कोरमुत बु बनावथ चु ताजदार । मे छि चानि ताजपूशी खॉतरु खास पोश बकार । गछख ना चु नज़दीकी सरस पेट तु अनख जल-जल । नेचिव्य कोरुस आंकार, "अदु क्याह" ।

जवान वांदरन वुछ सरस मंज्र पोश । मगर तँम्य चुच यिति ज़ि सरस कुन यिम पँदय गछान छि, यिमव मंज्र छुनु कांह ति वापस यिवान । सु गव गोतन, "क्याताम वकानु छु!" तस पेयि तिथुय सरकिस अँकिस तंग हिसस कुन नज़र । योत ताम सु आसॉनी सान वोटि ओरु योर तँरिथ हेकिहे । यिथु पॉदय सॉबररॉव्य तँम्य आबु सुत्यु अँदरनु वरॉय पोश ।

जलदुय वुछ सु आबु देवन, येम्य सर नेबर नीरिथ तस वोन, "चॉन्य गाटुजारन तु हेमुच बचोवुख चु म्यानि बयायि निशि । चे कथ छिय यिम पोश बकार ?" वांदरन कँर आबु देवस सॉरुय बावथ ।

खोश गँछिथ अँन्य आबु देवन जवान वांदरस पोश तु आस पतु-पतु । वांदर पादशाहन युथुय तिम यिवान वुछुय तँम्य वोन "मे ओस खयाल यि गछि मारु । देव छु तसुंद

नोकर बन्योमुत ।" अथ्य परेशॉनी मंज गव सु मॅरिथ । नवजवान वांदुर बन्योव पादशाह तु कोर तॅम्य राजा ताजा जान पॉट्य ।

सबक : हेसु रोजनस छु रूत फल ।

त्रे गाडु 'हलीम'

अॅकिस गामस नखु ओस ल्वकुट आबु सर । तथ मंज आसु वारयाह गाडु । तिमन मंज आसु त्रे बजि गाडु ति । अॅकिस ओस नाव दूर अंदेश, दोयिमि ओस नाव हॉज़िर जवाब, तु त्रेयेमि ऑस्य वनान नसीबु ।

दूर अंदेश गाडु ऑस सेठा गाटुज । हॉज़िर जवाब गाडि ओस मोकु विज़ि अकलि हुंद चोंग दज़ान । नसीबु ऑस नु हलु बलु करनुच सौथुय । अकि दोह द्रायि गाडु हाँज जोराह अमि तलावु किन्य । तिमव मंज वोन अॅक्य, "अलॉय यीचु गाडु । वुछ गाडु मारनुच किछ जाय छे यि ।" ब्याख गाडु हाँज वोथुस, "आ, पगाह सुबहॉय यिमव अॅस्य यूरय पनुन्य ज़ाल हेथ ।"

तेहंजु कथु बूज़िथ वोन दूर अंदेश गाडि, "वेसव, बूज़वु यिम क्या ऑस्य वनान । असि पज़ि गाडु हाँजन हुंदि पगाह सुबहन योर यिनु ब्रॉठ यि सर त्रॉविथ चलुन ।" नॅ नॅ बु रोजु यती, येलि तिम योर यिन तमि सातु सौंचु बु कांह वथ ।" यि वोन हॉज़िर जवाब गाडि । नसीबु गाँड वॅछुख दमा दिथु "बु नय त्रावु यि सर हर्गिज़ ति । दूर अंदरश गाडि ज़ोन यिमु बोज़न नु म्योन कैह । ल्यहाज़ा द्रायि स्व कुनी अमि सरु पेटु ।

बेयि दोहु सुबहॉय आयि गाडु हाँज ज़ाल हेथ तु त्रॉविथ अथ सरस । हॉज़िर जवाब गाडि ह्योत फोरन यड हयोर कुन वॅरिथ आबु पेट्य पान यिरुनावुन । गाडु हाँजव समुज यि छे मोमुच तु तिमव दिच स्व ज़ालु मंजु नेबर दारिथ । नसीबु गाडि करेयि पान बचावनु खॉतरु सरु किस चॅकिस ताम डुंगु दिनुच कूशिश मगर अफसुस स्व लॅज यकदम वो लु वाशस ।

काँशिर ज़बान छे सॉन्य प्रज़नथ, यि प्रज़नथ थॅविव बरकरार ।

काँशिर ज़बान छे सॉन्य दौलत, अथ दियिव वुसजार ।



वाह्य, ओमकारजिया, च कोत गोख !!!

रतन लाल शान्त

वाह्य, ओमकारजिया, च कोत गोख !!!

सुबचि साडु चोर बजे आसहन । मे गव दरवाज़स ज़ोरु टुक टुक । बु गाबर्योस तु गोस दवान बर मुचरावनि । अति छुसन वुछान कुस ताम बटुसॉबा खडा । सफेद कुरतु पाँजामा लॉगिथ कलस दस्तारा गॅडिथ तु ख्वरन बाटा चपुन्य छुनिथ । अँछन गागल तु अथस वयथ बैग । अमा यि कुस ज़न तु वुन्य रेलवे स्टेशन प्यठु स्योदुय मे निश आमुत ? काँसि रिशदारस यारस दोस्तस ति ओसुम नु वातुन । यि ओस बासान ज़न तु यूपी या बिहारकिस कस ताम ग्रीस्य बाँयिस गछुँन कोत ताम ओस तु वाँतिथ प्यव मे निश । मगर अँमिस ओस नु गौँछि लोवा नस्ति तल कनि कैह अलौद, तवु किन्य गोम शख खबर यि गछि नु कांह ग्रूस वूस आसुन । यि ज़न छु कुस ताम ज़ॉन्यकार । मे वुछ वारु । मे च़जेयि क्रख नीरिथ-हे यि क्वस सॉ वनन छि महारा तुहुँघन बखॉलन गाँमुच ? यि ओस नु बैयि कांह, यि ओस साख्याथ पाँडिथ स्वखानंद उरफि स्वखजुव । मगर ऑसु मंज़ु द्रायि नु मे आवाज़ ।

मे गव आश्चर । यि ओस बाज़ॉबितु स्वखानंद । बरस प्यठु खडा । न वनान कैह न अचान अंदर । शायद प्रारान बु वयाह वनु या करु तस वुछिथ ।

युथुय मे पकु व्यशवास गव यि छु स्वखानंद, रख बदलॉविथ ड्रामा करान तु मे इम्प्रस करनुच कूशिष करान, मे ति आव मनस मंज़ जि यि छु अज़ सुबहॉय गिंदन मूडस मंज़ । अँमिस गव योरु ति ड्रामा करनु । अदु क्याह, मतु वनतस किंही । करतस नरि थफ तु चानतन गरस अंदर ।

मगर स्वखानंद ओस नु गिंदन मूडस मंज़ बिलकुल । बल्कि सु ओस बडु सीरियस । बुथिस ओसुस नु सु शंगरफ कुनी युस बुज़रगी बावजूद अँमिस पशपान आसान ओस । कलस प्यठु दस्तारु बावजूद ओसुस बुमव प्यठु ज़न तु गम पशपान । सु ओस मे कुन तिथु कँन्य वुछान ज़न तु पननि ड्रामाबाँज़ी प्यठु शरमंदगी ऑसुस नु, बल्कि म्यानि शुर्यलॉज़ी प्यठु आर यिवान ओसुस ।

मे ऑस्य अँमिस वारियाह सवाल प्रिछुन्य ।मगर अँम्य संजु चौरिथ बुम वुछिथ दोप मे -पाना, लोत कर । यि वनि सौर्य दलील पानय ।

न्यँबर ओस व्वन्य बोड गाश आमुत तु गरमी हुंद प्रचंड ओस म्यॉनिस पँतिमिस कुटिस बूँ बूँ करान । बु गोस तु कर्यम तति बर तु दारि बंद । द्वयि गंट पतु अचि ताफ यथ कुटिस ति । पतु गँयि ग्वडु न्यँबर्य चिकु वालनि, पतु अँदुर्य परदु वाहरावुन्य । द्वहस अनिगटि कुटिस मंज्र चूरन हुंघ पॉठ्य ख्वखुत म्वखुत वँगरिथ बिहुन । तु यि वुछितन, अँम्य छु अज दस्तारु गौंडमुत तु मोमूल ख्वतु जँयादु पलव लॉगिमुत्य । योहोय जोकर ह्यु बन्न्योमुत ।

अँती बास्यव ज़न तु खामूशी मंज्र बोड टास गव, तिछुय क्रख दिच स्वखानंदन । जन तु वुनिस ताम दमकँरिथ ज़ोर तु शोर सौंबरावान ओस तु व्वन्य फाटवुन बम । वोनुन-ताँजुब छु चँ छुख वुनि बिहिथुय । च़े बूजुथ ना ओमकार कोलन त्रॉव्य प्रान राथ शामनस ? मे दोप च़े आसी बूजमुत तु च़ ति आसख नेरनुच तयॉरी करान । मगर च़ छुख क्याहताम पनुन्यनुय हॉरिसातन ।

मे छु नु युथ रोब अजताम काँसि कोरमुत, यीचि थज़ि आवाज़ि मंज्र नु कथ ति काँसि कँरमुच । न छु मे ज़ांह स्वखानंदुय यिथुवँन्य क्रकु दिवान वुछमुत ।

मे गव दम । अँदुर्युम शाह अंदर तु न्यबरुम न्यबर ।...क्याह द्रावा सोन टोट जानानु ऑखर यि असोर समसार त्रॉविथ ? द्युता ऑखरस म्यॉनिस टॉटिस व्वमजियिन्य अत्माहन असि जवाब ? हतसॉ, बु द्रासव, बस व्वन्य लडु नु बु । मे त्रॉव्यमव हथियार... ।

बूज़िथ गँयि मे कोठ्य तती बिहिथ । शरीरस ज़न तु ज़ुव वँडिथ न्यूख ।... नतु ऑस ना मे पताह यि छु सपदन वोल ? नतु ओसुस ना बु ज़ॉनिथ यि गँर यियि बेशूंक पॉठ्य तमि विज़ि, येलि नु बु अमि खॉतरु बिलकुल तयार आसु ।...

..... सिरिफ अख र्यथ ब्रॉट फरवरीयस मंज्र समख्योम दिलि सडकि प्यठ, मंडी हवुस म्यट्रो सिटेशनस न्यबर कनि, कस ताम मशहूर प्रोफेसरस सुत्य ओस तेज़ तेज़ पकान । मे प्यव कदम तेज़रावुन । आलव कोरमस तु यखदम रुक्यव, मंदुछ मंदुछ ह्यु असान कोरुन नमस्कार । येमि ब्रॉट ज़ि बु करुहॉ तस वुछिथ खुशी ज़ॉहिर, बु ओसुस कैह र्यथ ब्रॉटअँमिस गरु खबरि गोमुत, तेलि ओस स्यठाह कमज़ोर हालांकि असि करि तसुंदि दादि वरॉय प्रथ सबजक्टस प्यठ कथ । हमेशुक्य पॉठय रुद सु ल्वति बोलान तु मँज्य ठठु मखोल करान तु पनुन्य वुठ गुमनावान ।मे सुत्य ऑस्य मजरुह तु तलॉशी सॉब

ति।असि ति द्युत नु तँमिस बास जि अँस्य क्याह छि तसुंदि नाकारु दादि किन्य परेशान। तसंजु बेआरॉमी ऑस तसुंदि बुथि प्यठय पशपान।

तमि दवहु पतु अजु सडकि पकान वुछिथ आयि नु मे पछुय।

सु वोथ मे तोरय ल्वति पॉट्य- बु महारा ओसुस साहित्य अकादमी आमुत। त्वहि आसि तोरमुत फिकरि कथ सिलसिलस मंजु।... तु तोह्य ?

मे ति छे अँत्य मिटिंग। —मे ति वोनमस राजदॉरी सान। असि करि नु ज्यादु कथु तु तँम्य ह्योत मे नेरनु खॉतरु गुल्य जु गँडिथ इजाजुथ।

अमि मुलाकातु पतु वँर असि वारियाहि फिरि फोनस प्यठ कथ।

ओमकार रुद बराबर लेखान तु परान, हालांकि स्पहत ओस नु अँमिस यीचु म्यहनथ करनुक इजाजुथ दिवान। ‘वाख’ ति रुद लगातार कडान। तँम्य ओस प्वखु इरादु कोरमुत मोतस सुत्य लँडिथ ख्योन, ऑखरी शाहस तान्य.. मगर सु क्याजि गव ? ओमकारजिया च़े क्याजि त्रॉविथ हथियार ?

बु ओसुस सॉचान तु खबर म्यॉनिस बुथिस प्यठ कम भाव तु भावनायि आसहन व्वतलान तु बडान। मे छु सिरिफ यूतुय एहसास जि बुथ ओस मे अशि सुत्य बँरिथ तु आवाजु ऑसुम खँड्य फुट्य गॉमुच। मे ओस ब्रॉह कनि बिहिथ स्वखानंद मँशिथुय गोमुत.. शायद ओस मे पनुन पान ति मँशिथुय गोमुत..

न वँर मे दुबारु क्रख-व्वन्य क्याह च़े छुयि यिथय वँन्य पछतावान बिहुन किनु दिलि नेरनुक कांह संजु करनु ?

बु पयूरुस ह्यसु। मे पेयि व्वन्य पानस कुन नज़र। बु ओसुस बिसतरु मंजु यि दँप्यजि ति व्वठ लॉयिथ स्योदुय दरवाजु टासान स्वखानंदस बुथि द्रामुत। नॉल्य ओसुम अंडर शॉटु कछु।

स्वखानंद संजि क्रेकि कौरुस बु बेदार। फुटुचमत्यवुय क्वठ्यव च़ास ब्यडरुम तु रछा शॉयिस्तु पलव लॉगिथ आस। मगर अँमिस क्याह जवाब दिमु, ति तोगुम नु बोजुन।

तँम्य दँरुरोव बेयि पनुन सवाल- चु क्याह बेयि ब्यूठखु ?

बु छुस तस हांगुल ह्यूवुछान ? सु किथु वँन्य छु लठ तु पठ चॉरिथ आमुत, तिति छुस वुछान। पज़र गव यि कि रचि खंडि गव मे अँछन ब्रॉह कनि अनि गोट ह्यू। बु ओसुस यकदम ज़न तु दुगॉशिस मंजु दॉरिथ दिनु आमुत। अकि तरफु ऑस मे ओम जिथिनि गुज़रनुच दिलदोज़ खबर दिनु आमच़, बेयि तरफु ओस पँडिथ स्वखानंद मे ब्रॉठ कनि प्रारान जि व्वथ मे

सुत्य पख नेर । पथ ब्रॉठ वुछनु बगॉर । पँडितुन्य तयॉरी ति छुस वुछान । अमा यि ड्रस लॉगिथ छा अँमिस महाराजस सुत्य गछुन ? अँमिस बुडस मा छि मगुज्र डँल्यमुत्य !

शायद वुछुस बु तँम्य छ्वपु वँरिथ ऊर्य न यूर्य द्यमॉगी हालतस मंज । शायद ओस सु यि ति च़ेनान ज़ गँर गँर छि गछान तु पतु बनि नु कांह सवॉर्य ति ।

बांबरि तु सदमु सुत्य अगरय बु कांह फॉसलु वँरिथ ओसुस नु ह्यकान, मगर मनस ओस स्वखानंदस वुछिथ वुबोदुर व्वथान जि अँम्य छु यि अख रस्मी वाकु बनोवमुत । व्वन्य प्यव मे अमिस प्रुछुनुय, मगर तोह्य नय ऑसिवु ज़ांह दस्तार गंडान । मे छिमव नु ज़ांह कलस दस्तार क्या टूप्य दिथ ति वुछिमत्य ... गर्मी म्वखय अगर तु तेलि दीतव टोपि हना । थँविव दस्तार तुलिथ येत्य । बु दिमोवु नँव टूप्य पनुन्य ।

म्योन युतुय योत वनुन, तँमिस खोत वुछान वुछान बुथिस व्वशलुन, कनु प्यछु ताम व्वजलेयस । कलु ह्योतुन गिलनावुन दँछुन तु खोवुर । ज़न तु छांडान ओस क्याहतान्य । डंडु या लूर मा ओस वुछान कुनि मा छे, द्यौवु मे मार द्युन ओसुस । मे छु वुछान ज़न तु नज़रव सुती सूर करि । मे वोट ऑस यकदम । अमा मे क्याह गलती ऑस वँरमुच ?

‘चे क्याह बूजुथ , बु गछा डाक्टर ओमकारनाथ कोल सुंदिस दाह संस्कारस प्यठ आम बटन हुंद्य पॉठ्य ? मे क्याह सु ऑशनाव ओसा, किनु यार ? बु ओससा तस ज़ांह समख्योमुत ति ? सु ज़न आव ति जोम कुचि फिरि, साहिता मिटिंगु कर्यन, ल्यक्चर दिनिन, बाकय प्रोग्राम वँरिन या तोहि अदबी, साहिता- फन-कलाकारव वगॉरु वगॉरु वाल्यव करि मिटिंगु तु सेमिनार तु बेयि खबर क्याह क्याह । बु छुस प्रथ कुनि मुतलक अखबारस मंज परान । मगर मे वनता बु कर बुलोवहस यिथिस कुनि जलसस मंज ? च़य वन पननिस दिलस प्यठ अथु थँविथ चु हय छुख प्रथ जायि वातान; च़े वोनथा मे ज़ांह पख साँ मे सुत्य ? च़े ऑसुय खबर मे कोताह चुक तु अमार छु यिथ्यन नफरन मेलनुक आसान, यिम हकीकतन सानि समाजिक्य च़ीन्य छि ? लीडरव ख्वतु पज़ि असि यिमन यज़थ तु एहतिराम करुन । लीडर गछन मशरफु किस सँनिस द्वबस मंज गॉब ति क्याजि सियासत बदलि । अँजिच सियासत बनि पगाह बेमाने, पगहुच कॉलिक्यथ । मगर अँदीब सुंद ल्यखुत रोज़ि हमेशि खॉतरु मूजूद । खॉर, यि गव ति गव । बु ह्योकुस नु ओमकार कोल साँबस जिंदगी मंज समखिथ, मगर अज़ दिमु बु तँमिस ऑखरी सलॉम्य तु शुकरिया ति करस तु माँफी ति ह्यमस ।

स्वखानंदनि ज़ेठि तकरीरु सुत्य गँयि मे छ्वपु । दोपुम माँफी ह्यमस.. मगर अख इलज़ामा ओसा मे खसान.. । मे दोप अमा शुकरिया तय तु माँफी क्याज़ि ? मगर तँम्य द्युत

म्यानि प्रुछनु ब्रौठय पानय मे जवाब ।

थख वॅगडिथ ओसुन सु बेयि बोलुन ह्योतमुत-

‘ बु गछु तोर अँकिस आम बटु सुंदिस हँसियतस मंज । माँफी ह्यमस जि असि कौरुय नु चॉनिस कारस कदुर । असि परि नु चानि तिमु किताब, यिमन दुनियाहन कदुर कॅर । मगर शुकरिया ति करस जि चै वातनाँवथन सॉन्य ज़बान बड्यन कुतुबखानन तु बड्यन ऑलिमन हुंघन मेज़न प्यठ, सोन नाव नेशनोवुथ, चै आसी मूख्य तु परमदामस मंज जाय’ ।

पनन्यव दूशवुय अथव सुत्य कलस प्यठ दस्तारु शेरान वोथ स्वखानंद थोद । मे त्रॉवन हचरलद नज़रा तु द्राव ।।

मे बास्यव पँज्य पॉठ्य छु स्वखानंदस अंदर वुन्यकिस कॉशिरिस बटु सुंद सासु बघन वॅरियन हुंद इतिहास बेयि अकि लटि पनुन प्रामणिक यानी आथैटिक ताकथ ह्यथ पॉदु गोमुत । यि छु.... वुन्य क्यनस तम्युक तर्जमान बॅनिथ मे ब्रौठकनि । मे कौर तस कुन, तथ दिशायि कुन गुल्य ज़ु गंडिथ प्रणाम, येमि दिशायि सु द्रामुत ओस ।

कॉशिर ज़बान छे सॉन्य प्रज़नथ,

यि प्रज़नथ थँविव बरकरार ।

कॉशिर ज़बान छे सॉन्य दौलत,

अथ दियिव वुसजार ।



डा.रूप कृष्ण भट सुंज ताजु तसनीफ : अख नॅव वुछन त्राय

डा.रतन तलाशी

शॉयिर यां कांह ति तखलीककार नॅ छु मुबलिग आसान तु नॅ छे तसुंज कॉम समाज सुदारुक डोल वायान । बॅल्यकि तसुंज कॉम छे पनुन्यव तखलीकी तजरुबव सुत्य ज़मानु मकानु किस काठकरस मंज मुकीद ज़िंदगी हुंद चोक मोदुर वेत्रावन वॉलिस इनसानुसुंद सूरतहाल दीद मान करुन युथ इनसाॅनी ज़िंदगी हुंद कांह नतु कांह सिर सवेर आशकारु सपदि । मगर अमि बावजूद हयेकव नु अदबुकि समॉजी रोलु निशि इनकार कॅरिथ । तखलीककार सुंज तखलीक काँचाह ति जॉती नॅव्यतुच ऑस्यतन मगर ति कॅरिथ ति छे यि मसबत समॉजी तु इनसाॅनी कदरन अकि नतु बेयि रंगु सगुवान । यि कथ छे काँशरिस अदबस मुतलक ति सही तु सान्यव मुखतॅलिफ शॉयरव छि हुबल वतनी, इनसाॅनी लोलुक्य तु मसावतुक्य तु खास पाँठ्य मज़हबी रवादॉरी हुंद्य नगमु ग्येवमुत्य । योदवय ज़न कुलहम काँशरिस अदबस या इनफिरॉदी तखलीककारन मुतलक यिमन मोज़ूहन हुंदि हवालु मुखतलिफ काँशर्यव अदबी ऑल्मव मुखतॅलिफ ज़बानन मंज येति होति कैह मज़मून तु मकालु तहरीर कर्यमित्य छि मगर यिथिस मोज़ूहस मुतलक तु खासकर “काँशरिस अदबस मंज मज़हबी रवादॉरी” मोज़ूहस प्यठ ऑस वुन्युस ताम अख मुकमल तसनीफ शायद अनका । अज़ कोर डा.रूपकृष्ण भट साँबन यि छर्यर पूर । डा. भट छि माँहिरि लिसॉन्यात ,काँशिरि ज़बॉन्य तु अदबुक्य वसताद, तरजमुकार तु अख ज़ोनमुत मोनमुत अफसानु निगार ति । मगर अज़ छि यिम बहसयति म्वहकिक असि ब्रॉहकुन आमुत्य । डा. भट साँबुन्य यि तसनीफ छे तसुंजि दवन वर्यन हुंदि सबरु आजमा मुतालुच तु मेहनतुक नॅतीजि । किताब छे अलु पलु दवन हतन सफन प्यठ मुशतमिल तु योदवय अम्युक असुल मोज़ू “काँशरिस अदबस मंज फिरकुवारानु हमआहंगी” हुंज निशान देही छे मगर तमि बावजूद छे यि काँशिरि ज़बॉन्य, तँहज़ीब तु अदबी रेवायच हुंद्यन मुखतॅलिफ गोशन प्यठ मयित । यथ मंज कॅशीरि हुंदि डेगजल तँहज़ीबी पथ कालुच तसवीर ति व्वतलावनु आमुच छे तु अज़कालुचि तमि सयाॅसी व्वलुहॅरशि हुंज

ज़िकिर ति छे येमि किन्त्य मजूद ज़मानस मंज़ कॅशीरि हुंज़ सदी वादन हुंज़ तँहज़ीबी कदर नहनावनु छे आमच। बासान छु किताब तँहरीर करनस पसि परदु छु मुसनिफ सुंद सौंच जि सेहतमंद समाजकि तौमीरु बापथ छु ज़ोरूरी जि पनुनि पथ कॉल्य तँहज़ीबक्य अनसर गछन नवि सरु दँर्याफत करनु यिन्य युथ यिम असरी मसलु अँज़रावनु बापथ नोव जुव ज़ेतु सान दुबार काड कडन।

किताबि हुंद खाकु छु तमि आयि तशकील दिनु आमुत जि यि छे नु असल मोज़ूहस तामुय महदूद रुज़मुच बॅल्यकि छे ज़बान, अदब तु तहज़ीबस मुतलक ज़ानकौरी हुंद पिटारु बनेमुच। कौशिर ज़बान तु अदबी रेवायच हुंदिस मुफसिल तारुफस प्यत मुशतमिल तारफु अलावु छि यथ किताबि सथ बाब। ग्वडनिक्य ज़ु बाब छि असल मोज़ूहस पसि मंज़र ति अता करान तु मुसनिक सुंद पनुनिस मोज़ूहस नेसबत ज़ाँव्ययि नज़र ति मुशखस करान। ग्वडनिकस बाबस मंज़ छु मुखतॅलिफ ज़ेली अनवानन तहत ज़बान, अमिच मॉहियत, अँलिमि लिसायनयातुच वज़ाहत आलमी लिसाँनी खानदानन हुंद तज़करु, हँदुस्तानुक लिसाँनी मनज़र नाम तु खास पौट्य कौशरि ज़बौन्य हुंद आगुर तु इरतिका बेतरि वेछनावनु आमुत। दौयमिस बाबस मंज़ छु हँदुस्तानकि तँहज़ीबी विरयिक्यन जुज़यातन हुंदिस तज़करस अलावु कॅशीरि हुंदि तँहज़ीबी तु सकाफती इरति काहस सुत्य सुत्य कॅशीरि हुंद मिलुमिश तँहज़ीबी तवारीखुक अख म्वखससर जौयज़ि पेश करनु आमुत। अमि अलावु छे हँदुसतौन्य तँहज़ीबुच कसरतस मंज़ वहदत ज़ेरि बहस अँनिथ तिमन रूहौनी तु मॉदी तहरीखन हुंद तज़करु ति करनु आमुत यिम हँदुसतानकिस सतु सौंस्य तँस्ज़ीबस मंज़ हम अहंगी पौदु करान छि। मुसनिफन छि कौशरि तँहज़ीबी सरमायिच म्वल वन कॅरिथ तिमन अनसरन हुंज़ निशौनदेही ति कॅरमुच यिम कौशरिस तँहज़ीबस मुलकी सोथरिस प्यत हँदुसतौन्य तँहज़ीबस सुत्य हम आहंग करान छि।

किताबि हुंदयन बाक्य पांचन बाबन मंज़ छि अलग अलग पौट्य ग्वडुकालचि शौयरी, सूफी दोर, वुहमिसदी हुंज़ शौयरी, कौशुर अफसानवी नसर तु नमतु पँतिम कौशुर अदब मज़हबी रेवादौरी हुंदि हवाल ज़ेरि मुतालु अननु आमुत। ग्वडु कालचि सिरी तु अमि पतुचि सूफी त्रायि हुंज़ि शौयरी मुतलक छु मुसनिफ सुंद यि वनुन सही जि सयौसी गौर यकीनी तु गौर कौशर्यन हुकुमरानन हुंज़ि अदम दिलच्छपी सबबु येति आम लुख बद ज़चन सपुदय तति रूद कौशरयन शौयरन ति पनुनि ज़मानुक एहसास। यिमन शौयरन निश ओस आँला हकीकतुक इरफान न सिर्फ मकसदि ज़ात बॅलकि मकसदि हयात ति। मगर यि मंज़िल प्रावनु खौतरु आँस्य ज़ात तु ज़मानुक्य मसनूयी दयार मिसमार करुन्य स्यठा ज़रूरी। अमि कॅबीलक्यन शौयरन नँज्यदीख छु नु मज़हबी तफरीक या समौजी

जॉच बंदी हुंद कांह माने। इनसॉनी मोहबतु ईशवर तु अलाह सुंज वहदत तु ज्ञात हकीकयुक उरफान छु अमि शॉयरी हुंद हरतर। यथ निश मज़हबी तु समॉजी तफरुक अबस छि। बकोलि मुसनिफ यवदवय अमि त्रायि हुंजि शॉयरी मंज मज़हबी, मिल-चारुच कथ बुलंद बाँग पाठ्य आमुच छे नु अमा पोज़ हयातस लोल कांछुन वाजनि अमि शॉयरी हुंद मँजलि मकसूद छु वरगु वॉट्य यीय।

मुसनिफन छे येमि पज़रुच ति निशानदेही कॅरमुच जि वुहमि सदी हुंदिस ग्वडनिकिस नेसफस दोरान किथु पॉट्य कॅरय मँहजूरन तु आज़ादन तिम नगमु तखलीक यिमव सुत्य कौशर्यन पनुनि पथ कालकि अज़मतुक ऐहसास सपुद तु तिम सपुदय वॉसि वादन प्यठ पँहलिथ मज़हबी रेवादीरी तु इनसान शॉयरन हुंद यकसॉन्यतुक तु आलमि इनसान सुंदि पानन्यारुक दरस नुमायान कॅरिथ यिमन शॉयरन हुंज कॅशीरि हुंदिस मज़हबी मिलचारस नेसबत यिमन हुंज कोलुहॉरी ति गाशारॉवमुच। किताबि हुंद ऑखरी बाब छु नमतु पॅत्यमिस अदबस मुतलक यथ मंज मुसनिफन कुनि रवय रेवॉयती वरॉय तिमन महरकातन हुंज निशानदही कॅरमुच छे यिम सानि मज़हबी रेवायति हमअहंगि हुंजन कदरन हुंदय नहवनकार बनेयि तु यिम व्वन्य अदबस मंज महज़ अकि अरिज़ोयकिस सूरतस मंज ब्रौहकुन यिवान छि।

मजमोयी तोर छि किताबि हुंज खूबी यि जि मुसनिपन छे नु महज़ बयान बाँजी कॅरमुच बॅलके हवाल तु हॉशयन हुंद तहकीकी तरीक़कार वरतॉवित छे प्रथकंह कथ दावादॅलीलि सान पेश करनु आमुच। येमि किताबि हुंज अहमियत छे यि जि असरी सयाक सबाक लेहाज़ु छे यि बरवखत तु बर महल। मोज़ू लेहाज़ु ति तु मकसद लहाज़ु ति। नतु छु वुनकेनस यि फॉशिन बन्योमुत जी येमिस ति अथस मंज कलम तुलुन तगान छु सु छु मखसूस सिरी शॉयरस मुतलक फिरय फिरय दवहरावनु अमचु कथु यिकवटु कॅरिथ फकथ ज़बॉन्य तु लफज़न हुंद हुलिय बदलॉविथ किताब थुरान। मगर डा.भट छि पँज़ीरॉयि हुंदय मुसतहिक जि येमि किताबि जॅरियि छे यिमव कौशरिस अदबस अकि सॉदरवार न्वकतु निगह किन्य नज़र त्रॉवमुच। मे छे व्वमेद जि सॉदरवार मुतालास प्यठ मुबनी यि किताब करि परन वाल्यन पनुनि अदबुकि बेयि अकि पँहलू निश रोशनास तु कौशरि अदबकिस अथ पँहलूहस सुत्य दिलचसपी थावन वाल्यन ऑल्यमन हुंदि बापथ बनि बँहसि तँहरीक।



पादि कमलन तल

वेष्णु राजदान

पादि कमलन तल बु आसय
मूक्ष दिम बोड़ वर्गु दिम
गोम न्यँतरन खून जॉरी
बास प्रेत्यक्ष व्वन्य कास खॉरि
चानि आशायि योत बु आसय
या मे वर दिम मूक्ष दामुक
लोलु बागस पोश फोल्यमुत्य
शेरि लागय बावु कोसम
कया वनय अँस्य मंदुछेमुत्य
कर दया व्वन्य वुछ मु तथ कुन
चॉन्य ग्वन वेस्तारनुक ताकथ
छुय च्चे जय जय शामु स्वंदरी
ग्यानु दाता मूक्ष दाता
ही भवॉनी कर मे वॉनी
पजि मनु युस बँक्ति चॉनी
क्या छु संशय तसुंदि बापथ
चॉन्य ग्वन छुस बो वेचारान
अबसनुकय वर दल्ल कुनुय कर
सर्व व्यापख छेख च्वपॉरी
व्वन्य च्चे रोस कुस बोजि जॉरी
कर्म हीनन दरमु हीनन
डाल स्योद अथु कर्म लॉनिस

करनि चॉनी असत्वती
ही बर्गशेखा भगवती ।
छुस च्चे कुन जॉरी करान
अँस्य छि पापव वँल्यमुती ।
नाव्वमेद नेरय नु ज्रांह
नतु छुसय प्रारान येती ।
वेरि चाने चॉर्य चॉर्य
शोलुवुन्य कारेपती ।
चंदु छेन्य सोदा करान
शरमि सुत्य अँस्य गँल्यमुती ।
अनी कुस कस वनी
जामु शूबान छी छेती ।
छेख जगत माता चु छख
स्यद म्वखस दिम सरस्वती ।
करि निश्कल राथ द्यन
मूक्ष दामुक्य बर वँथी ।
पन ओमुक्य खारान बु छुस
नतु छु आछुर वँत्य वँती ।
अँस्य छि शॉरी क्या वुछव
हाव म्वख पेठ्य परबँती ।
कर्तव्यन सान्यन मु वुछ
प्रक्रमस चॉनिस खँती ।

वीलु ज़ॉरी बोज़ 'वेष्णस'
छेख चु रोशन छुस बु तोशन
पादि कमलन तल बु आसय
मूक्ष दिम बोड़ वर्गु दिम

रोज़ संतुष्ट सर्वदा
चुय मे बखशख थंज़ गंती ।
करनि चॉनी असत्वती
ही बर्गुशेखा भगवती ।

ललु वाख

हहु निशि हाह द्राव शाह क्या गव,
हहस तु हाहस शाह चुय ज्ञान ।
रुह निशि मोर द्राव क्याह वुछुय,
क्याह रुद बाक्य क्याह गव फ़ान ॥

ललु वाख

संसारस मंज़बाग कथ शायि रोज़य,
वेज़ि परम शिव शम्भू अघूर ।
त्वलि मंज़बाग बोय ललुनावन,
जिमरस मंज़बाग करस गूर-गूर ॥



चु माता कासतम गम

वेष्ण राजदान

चु माता कासतम गम
दितम दर्शुन च़ल्यम ग़म
मे माँजी आश चॉन्य छम
दया दृष्टि मे करतम
बु मा वोतुस च़े निश ज़ांह
तवय शरमंदगी मे छम
चु. दीवी क्याज़ि रूठुख
दितम दर्शुन च़ल्यम ग़म.
ग्वडन्य स्यद कर मे वॉनी
त्रेयिम त्रेयलूकि मंज़ सम
कोरुथ च़वन वीदनय अंद
शेयिम शिव रूप, बासतम
सँतिम बासतम मे सतरूप
च़े डींशिथ दीर च़लि यम
दज़ान छुय दूप कोफूर
नगारो साज़ मदहम
यिवान छिय ऋशेय इत्यादेक
बेदर रुज़िथ छि सरखम
नेथुर चॉन्य पदमु वँथुर
छु तथ निर्वाणुक थम
चु अष्टा दशब्बज़ा छख
च़े दीवी क्या ग़छी कम
छु बोड दरबार चोनुय
शोलु मारान छु व्यलकम

बु लागय भावु कोसम
बु लागय भावु कोसम ।।
बु लागय भावु कोसम ।।
बु लागय भावु कोसम ।।
मे वँरमय नु पाठ पूजाह
बु लागय भावु कोसम ।।
खँटिथ कथ जायि बीठुख
बु लागय भावु कोसम ।।
दोयिम दिम पॉर्यज़ॉनी
बु लागय भावु कोसम ।।
छु पुंचिम परमु आनंद
बु लागय भावु कोसम ।।
दज़्यम अँदरु ग्यानुक दुप
बु लागय भावु कोसम ।।
वज़ान छुय साज़ संतूर
बु लागय भावु कोसम ।।
करान दर्शुन छि सन्वख
बु लागय भावु कोसम ।।
कलस प्यठ म्वखतु छँथुर
बु लागय भावु कोसम ।।
मे तैय भोगा चु सोज़ुहख
बु लागय भावु कोसम ।।
वंदहय क़बीलु क्रोनुय
बु लागय भावु कोसम ।।

वँहरिथ छु मायायि ज़ाल
अम्युक व्यस्तार बनतम
नचान छी चंड तय मंड
प्यठय त्रावुख निरालम
चु छख शक्ति शिवस सुत्य
तम्युक मंत्र छु शम दम
छु ऑठम दूह चोनुय
मे सायस तल चु रछतम
वनान छुय वेष्णु राजदान
दया दृष्टि मे करतम
मे मॉजी आश चॉन्य छम
दितम दर्शुन च़ल्यम गम

मूहन मे वोलमुत नाल
बु लागय भावु कोसम ।।
तिमन दितु पानय दंड
बु लागय भावु कोसम ।।
छे यिछ अँगनस अंदर ज्यूत्य
बु लागय भावु कोसम ।।
बोज़ि पॅर्ययाद म्योनुय
बु लागय भावु कोसम ।।
चु मॉजय छख दया वान
बु लागय भावु कोसम ।।
बु लागय भावु कोसम ।।
बु लागय भावु कोसम ।।

ललु वाख

साहेब छु बिहिथ पानय वानस,
साँरिय मंगान कॅछाह दि ।
रोट नो काँसि हुंद रॉछ नो वानस,
यि च़े गछिय ति पानय नि ।।



यि छु संसार सोपनु माया

वेष्णु राजदान

यि छु संसार सोपनु माया
ज्योन तु मरुन युन तु गछुन
त्रय तु संतान छी चै बासान
यावनस मंज छ्वह छि द्यावान
द्वख छि रावुन्य द्वख छि प्रावुन्य
दिह्य त्यागु विजि सुत्य मा दिनम
वृद अवस्था येलि छि यिवान
शुर्य शुर्यन पनुन्यन वनान
बचपनस मंज अँम्य बोरमुत
व्वन्य दपव लाचार आसिहे
छुन नु ज्ञनमस ज्ञांह ति कोरमुत
त्रेश योदवय योरु मंगुहाख
जोरु सूरिथ जोरु फोरिमा
कव्ठि प्योमुत शोर करिहे
जामुतुर्य छि पामु सोज्ञान
ज्ञांह ति कोरुना खूब साला
कोरि वातन वॉरिव्यव प्यठु
असि किथव कन्य चोलुख त्रॉविथ
बाकि अंदर बोञुनावन
यश हावान ख्वश छि गछान
बस छि ख्यावुन्य साल तिथी
यश करुन छु कठ छि मारुन्य
चाय तलखुय गछि चावुन्य
ताञ्ज गरुम वाञ्जवानाह

मा छु नेरान सोरये
अतु गथ ओरु योरुये ।।
हमदरुद गमखार बोञ
मतलबुक परिवार बोञ ।।
द्वख छु अमिकुय सार बोञ
प्रोन काँगरि खोरये ।।
तेलि दिवान दकु दॉल्यये ।
ओस फॉतिर मोलुये ।।
छुनु जांह असि लोलये
ओस आसन वोलये ।।
काँसि सुती वोरये
जोरु आलव मा खसान ।।
तोरु फीरिथ छिम असान
कुस करय्स तथ गोरये ।।
बोञुनावान छी लुकन
आसुहव वुनि सुय थेकान ।।
जोरु लायन बाख बोञ
राञ्जु येंदरु काख बोञ
कोताह बोड ओस काख
बूजिथ मँजिम्य यॉर्यये ।।
युथ नु म्यादस वठ गछ्यख
खश गछ्यख या फ्रठ गछ्यख
साल ख्यथ यिनु सेठ गछ्यख
आँस्य बाँगरान गोरये ।।

यि छु संसार ब्रम तु बॉज्यगार
मूर्खन छिय बोजुनावान
खठ वेचारव कटु मारव
क्रतु वेद वॅर काख बेशख
कर तु वेचार कथ बकार छुय
यी चे येति कोरमुत आस्यथ
चित्र गुप्तन आसि ल्यूखमुत
राजदानस ग्यानुवानस
अल्पब्वजु किन्य युथ नु खारख
यि छु संसार सोपनु माया

सुत्य काँह कैह छा निवान
बोजु नॉविथ पछ अनान
सुत्य मुक्ति छा लबान
स्वर्गु मंडलस खोरये ।।
परिवारुक यश च़ेय
ती यिथी दरपेश च़ेय
तथ गछ्या कम पेश कैह
शेर खानस छा हिशर
पॉन्य पानस बोरये ।।
मा छु नेरान सोरये ।।

ललु वाख

कुस बब तय क्वस मॉजी,
कॅमी लॉजी बॉजीबठ ।
कॉल्य गछख कांह ना बब कांह नो मॉजी,
जॉनिथ कव लॉजिथ बॉजीबठ ।।

ललु वाख

आँचारय बिचॉर्य व्यचार वोनुम,
प्राण तु रुहुन द्ययिव मा ।
प्राणस बॅजिथ मजा चुहुन,
नदर्य छिव तु द्ययिव मा ।



लेखन वॉल्य

- डॉ० रतन लाल शान्त M-201, Royal Palm Flats, Akhnoor Road, Jammu
180005.(09419684914) rlshant201@gmail.com
- स्व. श्री मोती लाल क्यमू, अपना विहार, जम्मू।
- श्री ओमकारनाथ शबनम, वैशाली, गाज़ियाबाद।
- डा०रूपकृष्णभट, A-19, कैलाश अपार्टमेंट्स, सेक्टर 4, द्वारका,
दिल्ली-110078. (9868555535)
- श्री शंभुनाथ भट्ट 'हलीम', आई-1,कश्मीरी अपार्टमेंट्स, पीतमपुरा, दिल्ली।
- श्रीमती सुनीता रैना पंडित, नौयडा।
- प्रोफ. मजरुह रशीद, श्रीनगर।
- श्री प्रेमनाथ शाद, जम्मू।
- श्रीमती देबा नज़ीर, श्रीनगर।
- श्री रतन लाल जवहर, जम्मू।
- श्री ब्रिजनाथ बेताब, जम्मू।
- श्री राजंदर आगोश, जम्मू।
- डा०रतन तलाशी, श्रीनगर।
- श्री मोती लाल मसरूफ, जम्मू।
- प्रोफशाद रमज़ान, श्रीनगर।
- श्री अशोक गवहर, जगती, जम्मू।
- श्री जगननाथ सागर, जम्मू।
- श्री असीर किशतवाडी, जम्मू।
- स्व वेषु राजदान।

SAMANBAL 4 ORGANISED AT JAMMU



बावु पोश



Prof. Omkar N Koul

7th January, 1941 - 3rd May, 2018

Printed & Published by All India Kashmiri Samaj

from D-90, Sarojni Nagar, New Delhi - 110 023 Ph. : 24677114 E-mail : aiksnd@rediffmail.com

Printed by : Print Orbit Ph. : 9810625082 Email : pranavkoul@gmail.com

Editor : Omkar Koul

Price : ₹ 50/-